

Romanos

San Pablone An Pinkih Para

San Pablo Roma pipulura mama piannatchikas, usne an pinkih Roma pipulukin Cristora nijkulturuza panamtu. España sura ishimtuasmin, Pablone Roma pipulurakas ishira, uspa ussa kiwainnanapa. Pablone sun Romanos pinkih para, Roma pipulura uztuz Cristora an wat nijkulanapa, Cristo pashimtu aizpa piankamanapa, Cristo inintu aizpa kianapa (1.1-17).

Suasne Pablone paas pajte pamtu. An ñancha pajte Pablone Roma pipulura nijkulturuza Dios kaizta aizpa kamtanamtu, wan awa, Judío awakas, Judío chi awakas, kwail kiarit piankamanapa. Dios wan kwail kiarittuza ilnamtukas, Diosmin wan awaruza watsat milnashina (1.18–3.20). Jesucristone kwail kiarittuza wat kulnashina, ussa nijkulamtune, Diosta kaiyamtune (3.21–4.25). Diosta kaiyamtune, Jesucristora nijkulamtune, uspane Dioskasa wanmakkashina. Diosne Moisésta paiña inim pit ininta, Israel awa uspa kwail piankamanapa. Dios uspa kwail wat kulnarawane, paiña Sinam Izpul inintu, Cristo nijkulturuza kiwainnanapa, Dios pashit aizpa kianapa (caps 5–8). Judío awa Jesucristora sapparachi akwa, Diosne paiña pit Judío chi awaruza ininara, sun watsal pit mianapa. Judío awa Jesucristora sapparachikas, Diosne sun narit kwaltuza mama pashinat kit usparuza akwanamtu, Israel awaruza watsat milnanakima (caps. 9–11).

Minpa pajte Pablone pamtu, wan Cristora nijkultaruz ussa an pashianapa, Dios kaizta aizpa piankamanapa, Diosta kampamturuza pashinanapa (12.1–15.13). Suasne Pablone paiña izmuruza “kakishapu” kiznamtu (15.14–16.27).

Kakishapu

1 1 Nane Pablo mun ish. An pinkih uruza panamtus. Nakas Jesucristowa kiwainmika ish. Diosne nawa nat kit akwat kit paiña inintamika namta, paiña watsal pit akkwan awaruza kainananapa.

2 Diosne ñamin paiña watsal pit paranana namta. Suasne paiña kainammturuza Dios pit pinkihta paninnara. 3-4 Sun pitne Dios Painkulpa, au Anpat Jesucristowa kainammtu. Awakanain kawira. Ñamin paiña pampane David munazi. Ñamin Davidne katsa mikwa azi. Diosne ussa Dios Painkul mun kit paiña Sinam Izpul akwa irittuztas tinta kakulninta.

5 Cristo akwa, Diosne nawa kiwain kit paiña inintamika namta, paiña pit kainanapa, akkwan awa wan suras nijkulat kit Dios ininta aizpa kianapa. 6 Diosne uruzakas, Roma pipulura uztuzakas, akwanara, Jesucristora piankamanapa. 7 Nane uruza, Roma pipulura uztuza, Diosta pashimtuza, an pinkih panamtus. Mane nane au Diostakas au Anpat Jesucristorakas paikumtus, uruza wat kiwainanapa, kalpain uzanapa.

Pablone Diosta paikwat kit aishtaish kizta

8 An ñancha nane Diosta u akwa aishtaish kiztus, Jesucristo uruza tinta kiwainnara akwa. Nakas watsal ish, akkwan awa au sukin u Jesucristora nijkulamtu aizpa miamtu akwa. 9 Nane Diospa kal sap kit tinta kal kirau, Dios watsal pitkas paiña painkulpakas kainanapa, pailnakima. Pailta payukima Diosta paikumtasmin, nane uruza minamtus. Diosne na kiztu aizpa wacha i pian. 10 Nane Diosta paikumtus, na u uzkinpian piannan, sun minpa payura uruza iznana. Dios sun pashitne, kainchash irinash. 11 Nane uruza kwisha iznashimtus, Dios Sinam Izpul uruza kiwainnamtu kamtanana. Suasne une u kajichura an tinta namanazi. 12 Sunmin kaiznashimtus. Aune auruzpain kiwaintawamakpas. Une an tinta kulashina, na nijkultu akwa. Nakas an tinta kulshinas, u nijkulamtu akwa.

13 Cristora nijkulturuz, na pampa payukima u uzkin pianashira piankamtain. Chiwazha nawa inintachi. Makima pianasachish. Nane u uzkin awaruza Jesucristora nijkulninnashimtus. Mamaz sura sunkana kirau. 14 Nane kiwainmumika ish, wan awaruza kiwainana. Nane altim awaruzakas musu awaruzakas kiwainashimtus. Nakas pinkih pianchiruzakas pinkih piantuza-

kas kiwainashimtus. **15** Katmizna nane uruzakas, wan Roma pi-pulura uztuzakas, Dios watsal pit kainanashimtus.

Dios watsal pit tinta i

16 Nane Dios watsal pitpa mitsal kimanash. Sun pitkasa Diosne wan Dios pit para aizpa nijkulturuza watsat milnanashina. An ñancha Judío awaruzakas, an kwizta Judío chi awaruzakas watsat milnanashina. **17** Diosne paiña watsal pitkas aumiza minninnamtu, nil uzanapa. Diosne Diosta nijkulturuza nil uzninnashinai. Dios pit ka parit: “Diosne ussa nijultumikasha nil namninnazi, pailta payukima uzanapa.”^a

Pailta awane Dios iztakin kwail kiarit

18 Chiyuras Diosne wan awaruza Dios kimtu aizpa minin-namta. Awa Diosta nijkularachi akwa, Diosne usparuza ilnana-zi, uspa kwail kiarit akwa. Uspa kwail kiamtu akwa, uspane watcha Dios kaiztu aizpa sappashimtuchi. **19** Sun akwa Diosne usparuza ilnanazi. Uspane Diospa wat piankamara, us usparuza Diospa annara akwa. **20** Dios an su sarasmin, awane Dios tinta i piankamashina. Diosta izasachikas, Diostakas piankamashina, paiña kal an sukin kimtu akwa. Katmizna sun kwail awaruzne Dios iztakin uspa kiarit aizpa pakpaasachi. **21** Diospa miamtu-kas, Dios uztu piankas, uspane Dios kwisha wari kizarachi. Diosta “aishtaish” kizarachi. Uspa minñakane, uspane Diospa minñashitchi. Kain minñamtu akwa, uspane timpa awakana minñara. Uspane wat chi minñara. **22** Akkwan pianmakpas kiz-amtukas, uspane timpa awakana mai. **23** Mane uspane Dios uz-mikasha wakpuj wainñamtuchi. Ti awakana sarawane, sunta wakpuj wainñamtu. Katsa wamkanakas, kalpakanakas, piainti-kanakas saat kit wakpuj wainñara.

24 Katmizna timpa awa akwa, Diosne usparuza chihkanarit, wan kwail minñashimtu aizpa kianapa. Usparuzpain akkwan tuntu mitsal kwail kiarit, uspa ñakin kwail kiarakima. **25** Uspa watcha Diosta nijkulashitchi akwa, uspane tikasa sarit aizpa wakpuj wainñara. Sun tine dios chi. Uspane wan dios sarit aizpa minñat kit wakpuj wainñara. Diosta, wan saramikasha, wakpuj

^a 1.17 Hab 2.4

wainñashitchi. Awane an wat Diostain pailta payukima wakpuj wainñarawa. Sunne watcha i. Ka.

26 Timpá awa sunkana kiamtu akwa, Diosne usparuza chihkanarit, wan mitsal kwail minñamtu aizpa kianapa. Paas ashampane parejuin pitshiilta. Mazane ampukanain namtu. Ashamparuzpain pit kit kwail kiamtu. Sunkana uzam. **27** Kawarain ampuruzne uspa ashamparuza chihkamtu, ashampakasa pitmanpa, ampukasa pittana. Paas ampune parejuin pitshiilta. Mazane ashampakanain namtu. Ampuruzpain pit kit kwail kiamtu. Sunkana uzam. Sun kwailne mitsal kiarit. Katmizna uspa sunkana uzamtu akwa, Diosne usparuza ilnanazi.

28 Diospa watmin minñamtuchi akwa, uspane Diosta piankamashitchi. Katmizna Diosne usparuza chihkananazi, uspa kwail minñamtu aizpa kianapa. **29** Uspane wan tuntu kwail kiashimtu. Mamaztuza kwail kiashimtu. Mamaz mijtuzkin an akkwan pashiamtu. Wan awaruza aliz kulamtu. Patna mij aizpa pashiamtu. Mamaztuza piantashimtu. Mamazkasa waya kiamtu. Uspane mamaztuza pirail appamtu. Akkwan tuntu kwail kiana minñamtu. Mamazpa parakane, kwail paraamtu. **30** Anparuzne mamaztuzpa kwail paramtu. Diosta aliz kulamtu. An we tinta mikasha aliz paramtu. Usparuzpain “aune an tinta makpas” kizamtu. Mamaztuza “aune an tinta makpas” kizamtu. Mamaztuza kwail kianapa minñamtu. Uspane papihshtakas akkuhshtakas miashimtuchi. **31** Uspa minñarakas, miashitchi. Uspa kin namtu aizpa kiamtuchi. Uspa kwaltuza pashiamtuchi. Mamaztuza wat kulashimtuchi. Naizturuz akwa chinkas mazamtuchi. **32** Sun awa Dios kaizta aizpa an wat piankas, Diosne sunkana kwail kinturuza iarínazi kiznara. Sun kwail kinturuzne mamaztuz kwail kiamtu aizpa wari kizamtu.

Diosne kwail kinturuza ilnana ininnamtu

2 ¹ Diosne Judío chi awaruza ilnanazi, uspa kwail kiamiztu akwa. Katmizna minminkas uruztas Judío chi awaruza nu kwail kirit kaiznawachi. Judío awa Judío chi awaruza “nu kwail kirit” kizturuzne uruzpain Dios iztakin pakpasachi, nukas sun kwailmin kimtu akwa. **2** Dios kimtu aizpa watcha i pianmakpas. Dios Judío chi kwail kirittuza ilnanapa ininkane, usne nil aizpa kimtu. **3** Nu Judío awane Judío chi kwail kinturuzkanain kimtu. Nune Judío chi awaruza “une kwail

kiamtu” kiznamtu. Dios kwail kimturuza ilnana ininkane, Diosne watcha u Judío awaruzakas tinta ilnanazi. **4** Nune Diospa wat mintuchi. Usne wantuza kwisha wat kininnashimtu. Uskas uspa kwail akwa awaruza azain ilnamtuchi. Uskas uruza kwisha pashinamtu. Diosne nua wat kimtu, nu kwail kimtu aizpa chihkanpa, nu Diosta anpa, Dios nua maiznapa. **5** Nu Dios kaiztu aizpa mishimtuchi akwa, nune u kwail kishimtu aizpa chihkamtuchi me. Nu Diosta kailtuchi akwa, Diosne nukasa aliz kultu, nu akkwan kwail kirit akwa. Dios kimtu aizpa watcha i. Katmizna nua ilna ininkane, Diosne nua an tinta naizninnazi. **6** Diosne wat kimturuza wat kiwainnanazi. Uskas kwail kimturuza ilnanazi, uspa kwail kiarit akwa. **7** Diosta saimturuzne mamaztuza wat kinanazi. Diosne suntuza “u watsal kiamti” kiznanazi. Diosne usparuza wat minñanazi. Diosne usparuza pailta payukima chiyura uzninnanazi. **8** Uskas waya kishimturuzakas watcha miamtuchiruzakas kwail kiamturuzakas pilchapuznanazi. Usparuza tinta ilnanazi. **9** Diosne wan kwail kimturuza tinta naizninnanazi, kwisha ishnakima. An ñancha Judío awaruzne naizanazi. Kwizta Judío chi awaruzne naizanazi. **10** Diosne wan wat kimturuza “une watsal kiamti” kiznanazi. Usparuza wat minñanazi. Usparuza kalpain uzninnanazi. An ñancha Diosne Judío awaruzakas kwizta Judío chi awaruzakas watsal uzninnanazi.

11 Diosne pailta awaruza kawarain kinanazi. **12** Judío chi awaruzne Moisés ininta aizpa sapparachi. Moisés ininta aizpa mijchikas, uspane kwail kiat kit mama iarinazi. Judío awaruzne Moisés ininta aizpa sappazi. Uspa kwail kiamtu akwa, Diosne usparuza Moisés parit akwa ilnanazi. **13** Diosne Moisés ininta aizpa mĩmturuza wat paninnamanazi. Usne Moisés ininta aizpa kimturuza wat paninnanazi. **14** Diosne Judío chi awaruza Moisés ininta aizpa milanarachi. Awa Moisés ininta aizpa sapparachikas, minpazha us ininta aizpa kimtune, usne Dios pashimtu aizpa piankam kit kimtu. **15** Kaijchura Dios ininta aizpa nijkulamtu akwa, uspane sun ininta aizpa minñat kit kiamtu. Ayukta wa aizpa ussa kuruntu. Masetne kaijchura kwail kirau mintu. Masetne kaijchura wat kirau mintu. **16** Iltu payura taizkane, Diosne awa ayukta puintit mij aizpa mĩmanazi, usparuza ilnana. Sunkanane nane Jesucristowa watsal pit uruza kainannamtu.

Moisés ininta pitkas Judío awaruzkas

17 Mane u Judío awaruza parananash. Nune “Judío awa ish” kiztu. Nune “Dios ap Dios i” mintu. Nune “na an tinta ish” kiztu, Moisés ininta pit nuwa milarit akwa. 18 Nune “Dios pashimtu aizpa pianish” kiztu. Dios paiña pit nuwa kamtarit akwa, “Mane watmin nanash,” kiztu. 19 Nune “kamtammika namtus” kiztu, Diosta we piantuzakas Diosta wat nijkultuchiruzakas kamtanana. 20 Nune “pianchiruzakamtanashimtus” kiztu. Nune “Dios p̄inkih panintit aizpa nijchiruzakamkamminamtus,” kiztu, wacha piankamanapa. Nu sunkana mintu aizpa kain. Nu salamtit. 21 Nu mamazta kamtamtukas, nune nu kamtamtu aizpa kimtuchi. Mamazta walkumun kiztukas, nune walkumtu. 22 Nu mamazpa ashampa m̄ilmun kiztukas, nune mamazpa ashampara nakat kit miltu. Nu dioskana saritta wakpuj wainmun kiztukas, nune sun dios sarit uzkin nap kit pial tarit aizpa walkumtu. 23 Nune “nain an warish” mintu, nu Moisés ininta aizpa iztu akwa. Nu Moisés ininta aizpa iztukas, nune us inintu aizpa kimtuchine, Diosne nua ilnazi. 24 Dios pinkihta ka parit: “Nu Judío awa Diosta izkitchi akwa, Judío chi awaruzne Diospa kwail paraamtu,”^b ka kizta.

25 Judío awa Moisés inintu aizpa m̄imturuzne watsal kiana. Judío awa Moisés inintu aizpa m̄imtuchiruzne, Judío chi awa uztukanain uzamtu. Uspane Diospa kwal namamanazi, titta señał samtuchiruzkana, circuncisión kitchiruzkana. 26 Judío chi awa Moisés inintu aizpa m̄imtune, usne Judío awakanain, titta señał samtumikakanain, circuncisión kiritmikakanain, namnazi. Suasne Diosne ussa sapanazi, Dios ininta aizpa mit kit kirit akwa. 27 Sun titta señał samtuchimikane, circuncisión kiritchimikane, Moisés ininta aizpa m̄imtune, sun titta señał samtumikakana, circuncisión kiritmikakanain, namnazi. Suasne sun Judío chi awaruzne Judío awaruza, titta señał samturuza, circuncisión kittuza, Moisés ininta aizpa saptittuza “kwail kiare” kiznanazi, uspa Moisés ininta aizpa miarachi akwa. 28 Judío awaruzne “aune Diospa kwal makpas” kizmumai. Une u Judío papihsh akwa, u Judío akkuhsh akwa Diospa kwal namasachi. Titta señał ñara samturuzne, circuncisión kirittuzne, une sun akwa Diospa kwal namasachi. 29 Dios Izpulne awa ayukta, pai-

^b 2.24 Is 52.5

ña kajchukin, maiz kit Diospa kwal namnintu, Dios inintu aizpa kinpa. Diospa kwalne kajchukin Diosta nijkul kit us kuruntu aizpa kimtu. Diosne kajchukin maiztittuza “une wat awa mai” kiznanazi.

3 ¹ Na kaiztu aizpa minaka. Dios Judío awaruza nanarit akwa, Diosne Judío awaruza, tittit señal sarittuza, circuncisión kirituza, wat iznamtu. ² Uspane Diostas akkwan sappara. An ñancha Diosne usparuza akkwan pit kin nam kit Dios pit chihkana-ra, wantuza kamtanana. ³ Judío awa Dios pit sapparitkas, mazantuzne us kaizta aizpa miashitchi. Mazantuz us kaizta aizpa miashitchikas, Diosne mizurainkas awakanain maizmanazi. Dios kin namtit aizpa kimanazi kizmanapas. Watcha Diosne au akwa us kin namtit aizpa kinazi. ⁴ Diosne mizurainkas wenammanazi. Wan awa pirail kaizamtukas, Diosne pailta payu watcha kaiztu. Dios pitta ka parit:

“Awa Dios paramtu aizpa piankamarawane,
awaruzne ‘Dios kirit aizpa wan nil i’ kizanazi”^c

⁵ Minpazha ñanta ka kaizshinamai: “Awa pailta payu kwail kimtuasmin, suasne Diosne pailta payu paiña kwail kimtu aizpa wat kulnazi. Suasne Dios kwisha wat akwa, usne nawa ilmanazi,” kizanazi. Sunkana awa mintukanain minman. Dios wan nil kimtu akwa, usne wan kwail kimturuza ilnanazi. ⁶ Diosta kain pit kaizman. Diosne mizurainkas wenammanazi. Dios kwail kiratne, usne an sukin kwail kimtuza ilshinamanazi. Dios nil kimtu akwa, Diosne kwail kimturuza uspa kwail kiamtu aizpa kaiznanazi.

⁷ Minpazha ñanta kaizshinamai: “Na Dios inintu aizpa mimtuchikas, Diosne nawa wan chiwal wat kulnazi. Suasne Dios awara wat kulna kin namtit akwa, awane kwisha wari kizanazi. Katmizna Diosne nawa ilnawachi.” ⁸ Suntuzne sunkana ñanta kaizamtu: “An akkwan kwail kitpamakpas, Dios an akkwan kwail kimtu aizpa wat kulnapa.” Uspane pirail kaizat kit na sunkana kamtamtus kizamtu. Diosne sunkana kaizamturuza watcha naizninnanazi.

Wan awaruzne kwail kiarit

⁹ Sun akwa Judío awane Judío chi awakin an palichi mai. Judío awaruzkas Judío chi awaruzkas Dios iztakin kawarain mai,

^c 3.4 Sal 51.4

Dios u Judío awaruzkas Judío chi awaruzkas kwail kiarit kiznarit akwa. **10**Dios pitta ka parit:

“Minminkas nil kisachi.

11 Minminkas misachi.

Minminkas Diosta saimtuchi.

12Wantuzne Dios kuruntu aizpa chihkaara.

Uspane kwail kiamtu uzamtu.

Minminkas wat kimtuchi.”^d

13“Kwail awa parakane, usne paiña pit isak kit kwail pitmin paramtu.”^e

“Uspane pïrail appamtu. Kamta awara kwatne, pininu akwa irinazi.

Sunkana kwail paramtuzne awaruza kwail kirinanazi.”^f

14“Awaruza kwail pit paramtuasmin, sun aliztuzne awaruza kwail kiashimtu.”^g

15“Uspane azain iamtu, awara aim kiana, awara piantana.

16Uspane mamaztuza kwail kiashit kit tayalninnamtu.

17Uspane mamaztuza kalpain uzninnamtuchi.”^h

18 “Uspane Diosta mikiamtuchi. Diosta mikiamtuchi akwa, ussa ishkuamtuchi.”ⁱ

19 Aune Dios paiña pit wantuza ininta pianmakpas. Katmizna minminkas “nane kwail kitchish” kizsachi. Pailta awane Dios iztakin kunnat kit sua uspa kwail kiarit aizpa nijkulanazi. **20**Diosne Moisés ininta aizpa miashimturuzza sapanamanazi. Us pa kwail kiamtu akwa, usne usparuza wat kulnamanazi. Dios paiña pit awaruza innarrit akwa, awane uspa kwail kiamtu aizpa piankamashina, minminkas wan inintit aizpa kit akwa.

Diosne Jesucristora nijkulturuza watsat milnanazi

21 Mane mizhain. Awane Moisés Judío awaruza ininta aizpa kiasachi, Dios usparuza wat kulnanapa. Awa Moisés ininta aizpa miamtuchikas, Diosne awaruza sapananazi, uspa kwail wat kulnanapa. Ñamin Dios kainammtuzne Dios pïnkïhta “Dios awaruza sapnat kit wat kulnanazi” paarit. **22**Diosne wan Jesucristora nij-

^d**3.12** Sal 14.1-3 ^e**3.13** Sal 5.9 ^f**3.13** Sal 140.3 ^g**3.14** Sal 10.7
^h**3.17** Is 59.7-8 ⁱ**3.18** Sal 36.1

kulturuza sapat kit uspa kwail kiarit aizpa wat kulninnamtu. Judío awaruzkas Judío chi awaruzkas Jesucristora nijkularawa, Dios uspa kwail wat kultananapa. Judío awakas Judío chi awakas Dios iztakin kawarain mai. ²³Pailta awa kwail kiarit akwa, uspane Dioskis attish chaamtu. ²⁴Dios aumiza pashinamtu akwa, Diosne au kwail kiarit aizpa kainmin wat kulnarit, Diospa kwal namana-pa. Jesucristo au akwa irit akwa, Diosne au kwail kiarit aizpa kaminna, au kwail akwa naizamanpa. ²⁵Diosne Jesucristora wan awa akwa inapa ininta. Usne irit, Dios Cristora nijkulturuza wat kultananapa, Dios awakasa pilchapuzmanpa. Diosne an ñamin uz-tuza tailchanat kit impará imparáin kurunnara. Kwail kiaritkas, mane Diosne Jesucristo akwa uspa kwail kiarit aizpa wat kulshinat kit nil namnara. ²⁶Ma payu Diosne kwail kimturuza naiznin-nat kit wantuza us wat kimtu aizpa ananamtu. Dios wat akwa, us-ne Cristora nijkulturuza wat kulnashina, usparuza wat awa nama-napa.

²⁷Minminkas Dios iztakin “nane wat kulish” kizsachi. Awa wat kal kimtukas, Diosne awaruza uspa wat kal akwa wat kulmanazi. Awa Cristora nijkulamtu akwa, Diosne awaruza wat kulnashina. Sunkana Diosne awaruza paiña kwal namninamtu. ²⁸Sun akwa aune sunkana minpuspas. Diosne Judío awaruza, Moisés inintit aizpa miamturuza wat kulnamanazi. Usparuza sapanamanazi. Usne Cristora nijkulturuzain sapananazi, uspa kwail kiarit aizpa wat kulnanapa.

²⁹Diosne Judío awaruzain nanazi, paiña kwal namanapa. Usne Judío chi awaruzakas nanara, paiña kwal namanapa. Watcha Diosne Judío awaruzakas Judío chi awaruzakas kawarain nanara, Dios iztakin nil uzninnanapa. ³⁰Katmizna maza Dios uztu akwa, usne Judío awa nijkulamturuzakas Judío chi awa nijkulamturuzakas kawarain wat kulnanat kit paiña kwalkanain sapananazi. ³¹Cristora nijkulturuzne Dios Moisésita inintit aizpa chihkaapiznamanazi. Aune Dios inintit aizpa wari minpuspas.

Abrahampa kwinta

4 ¹Mane Abrahampa, au ñamin irit kwalpa minñazsan. Abraham kamtit aizpa piankamasan. ²Dios Abrahamta wat kul-takas, ussa wat namtitkas, Diosne ussa saptachi, paiña wat kal akwa. Katmizna Abrahamne Dios iztakin “Na kirit akwa, wat

namish” kizsachi. ³Dios pinkihta ka parit: “Abraham Diosta nijkultit akwa, Diosne ussa wat namnin kit paiña kwail kirit aizpa wat kultit.”^j ⁴Kalpamikane kal kimmikasha pial tamtu, paiña kal kimtu akwa. Kalpamikane kain milamtuchi, kal kimtumika us saptu aizpa kana kimtu akwa. ⁵Kawarain minminkas paiña kal kisachi, Dios ussa wat namninnapa. Diosne sunkana awaruza kamtanamtuchi. Diosne kwail kimturuza, Diosta nijkulturuza wat namninnat kit uspa kwail wat kulnanazi. Awa Diosta nijkulamtu akwa, Diosne usparuza sapnat kit uspa kwail kaninnanashina. Awane chinkas kisachi, ussain watsat milnana. ⁶Namin Davidne watsal kimtumikawa kainara. Awa Moisésta inintu aizpa kimtuchikas, Diosne awara wat namninhina. Wat namtitmikane wat kulnazi. ⁷Sunkana parit:

“Diosne Dios inintu aizpa mimituchiruzakas ñanta kwail kimtuzakas wat kulninnamtu.
Sun akwa uspane wat kularit maanazi.
Uspane watsal maanazi, Dios uspa kwail kaninnamtu akwa.

⁸Uspane wat kularit maanazi,
Dios uspa kwail mainnintu akwa.”^k

⁹Diosne Judío awa señal samturuzakas Judío awa señal samtuchiruzakas wat kularit maanazi. Mamasa ka kaiznamtus: “Abraham Dios kaizta aizpa nijkultit akwa, Diosne ussa sap kit paiña kwail wat kul kit wat namninta.”^l ¹⁰Diosne Abrahamta sap kit wat namnintit, Abraham Judío awa señal paiña ñara sarachasmin. Dios Abrahamta wat namnintawane, Diosne Abrahamta Judío awa señal paiña ñara sanapa ininta. ¹¹An ñancha Diosne Abrahamta wat namninta. Kwiztane Abrahamne Judío awa señal paiña ñara sanintit. Dios Judío awa sarachasmin, Dios Abrahamta sun señaalkasa sanintachasmin, Abrahamne Diosta nijkulta. Diosne wan ussa nijkulturuza sapnat kit uspa kwail wat kulninnamtu. Wan Diosta nijkulturuza Abrahamta uspa papihshkanain mijmazi. ¹²Judío awa señal uspa ñara saamturuza Abrahamta uspa papihshkanain mijanazi, Abraham nijkultakanain nijkularane. Circuncisión kitchasmin, Abrahamne Diosta nijkulta.

^j 4.3 Gn 15.6 ^k 4.8 Sal 32.1-2 ^l 4.9 Gn 15.6

Diosne ussa nijkulturuza milan namtu

13 Diosne Abrahamtakas paiña kwizta kwaltuzakas sun su sappanapa milan namnara. An sukin uztuasmin, Abraham Dios milan namtit aizpa saptachikas, usne Dios kaizta aizpa mira. Diosta nijkultit akwa, Diosne ussa wat namnin kit paiña kwail wat kulta. 14 Moisés ininta aizpa mimituruzne “aune Dios milan namtit aizpa sappanapas” ñanta minñamtu. Katmizna Dios kin namtit aizpa uspa akwa kainsih. Sunkana minñamtune, Diosta nijkulna kainsih. 15 Awa Moisés ininta aizpa miarachi akwa, Diosne kwail awaruzza aliz kulnat kit usparuzza ilninnanazi. Dios sun pit ininnaratkine, awane sun pit miasachiwal. Awa sun ininta pit pian akwa, uspane uspa kwail kiarit aizpa piankamat kit sun ininta pit miashitchi.

16 Abraham Diosta nijkultit akwa, Diosne ussakas paiña kwizta kwaltuzakas wat kinana namta. Watcha, Diosne us kin namtit aizpa milanana wenamanazi. Judío awaruzkas Judío chi awaruzkas Dios milan namtit aizpa kawarain sappanazi, Abraham nijkultakanain nijkulamtu akwa. Sunkana wan Diosta nijkulturuzne Abrahamta, uspa papihshkanain mijmanazi. 17 Dios pinkihta ka parit: “Akkwan suras awaruzne Abrahamta ‘nune au papihsh i’ kizanazi.”^m Abrahamne Dios kaizta aizpa nijkulta. An Diosne irittuza mamasa kakulninnashina. An Diosne chiwazha an ñamin tuchi aizpa sashina. Sunkana Abrahamne Diosta nijkulta.

18 We piankas, Abrahamne Diosta nijkul kit tirizta, Dios sun kin namtit aizpa sapnakima. Diosne paiña kwal akkwan pashpa kawiranazi kizta. Dios pinkihta ka parit: “U kwalne kwisha akkwan pashpa milnanazi.”ⁿ 19 Cien año uztakas, kwisha ilapa paritkas, Abrahamne Diosta nijkulmizta. Akkwan año mij akwa, Abrahamkas Sarakas pashpa milsachiwailkas, Abrahamne Diosta nijkulmizta. 20 Abrahamne Dios kin namtit aizpa an tinta nijkulmiz kit an tinta namta. Usne “Dios kin namtit aizpa kisachi” kaiztachi. Uskas “Dios kwisha wari,” kizta. 21 Diosta wat piankamtit akwa, usne sunkana minta: “Watcha, Diosne us kin namtit aizpa kishina.” 22 Katmizna Diosta nijkultit akwa, Diosne Abrahamta wat namnin kit ussa wat kulninta.^o

^m 4.17 Gn 17.5 ⁿ 4.18 Gn 15.5 ^o 4.22 Gn 15.6

23 Dios Abrahamta wat namtitkas, Diosne an akkwantuzakas wat namninnashimtu. 24 Diosne au akwakas sun pit parit, ma payu Diosta nijkulturuza wat namninnanapa, au kwail kiarit aizpa wat kulninnanapa. Aukas Dios au Anpat Jesústa irittas kakulninta nijkultumakpas. 25 Au kwail kiarit akwa, Diosne Jesús-ta chihkarit, awa ussa piantaanapa. Diosne kwiztane ussa irittas kakulninta, aumiza wat namanapa. Au Anpat Jesucristo akwa, Diosne aumiza chiyura pailta payukima uzninnanazi.

Diosne awaruza wat namninnamtu.

5 1 Mane au Diosta nijkulamtu akwa, Diosne aumiza wat namninnat kit au kwail wat kulninnara. An Anpat Jesucristone aumiza Dios iztakin kalpain uzninnamtu. 2 Au Diosta nijkulamtu akwa, Diosne aumiza sapnat kit watsal kiwainanamtu. Aune us au akwa kintu aizpa pianmakpas, us aumiza wat uzninnamtu akwa. Aune Diosta tiriztumakpas, Dios aumiza uskanain namninnakima. Sun akwa, aune kwisha wat puramakpas. 3 Dios aumiza wat kinamtuasmin, aune wat kulanapas. Au parishiztukas, Dioskas aumiza wat kulninnashina. Parishiztuasmin, aune wan tailchamtumakpas, an tinta namana. 4 Diosne wan parishizmu tailchamturuza wat minñamtu. Dios au akwa wat minamtu akwa, aune us milan namtit aizpa sapna tiriztumakpas. 5 Sunkana Diosne us kin namtit aizpa tirizturuza mitsal chi kininmanazi. Usne aumiza pirail kaizmanazi. Diosne paiña Sinam Izpulta au kaijchukin uznapa ininta, yawa Dios aumiza panashimtu piankamanapa.

6 Au tinta chi akwa, aumizain kiwainarachi akwa, Cristone wan kwail kirittuz akwa irit. Diosne Cristowa irimtu payu narit. 7 Izti, auruzpain minminkas mamaz akwa imanazi, kwail kiritne. Kainchas mazane wat kintumika akwa ishina. 8 Au kwail kiaritkas, Diosne yawa aumiza pashinara annat kit Cristora au akwa inapa ininta. 9 Cristo au akwa irit akwa, Diosne aumiza wat namnat kit au kwail kiarit aizpa wat kulnara. Dios awaruza wat namninnarane, usne aumiza watsat milnashina, minpa payura parishizamanpa. 10 Aune Diosta aliz manashi. Diospa Painkul au akwa irit akwa, Diosne aumiza paiña izmuruz namninnara. Dios aumiza paiña izmuruz namninnashimtune, manaz Diosne aumiza watsat milnashina, Cristo uztu akwa. 11 Dios aumiza watsat milnashimtu akwa, Diosne aumiza watsal kulnin-

nanazi. Sunkana Jesucristone aumiza Diospa izmuruz namninarit.

Adánkas Cristokas

12 An ñamin au sukin Adánne, maza awain, kwail kirit. Usne sun kwail kirit aizpa wantuza kwakninnara. Kwiztane wan awane Adánkana namarit. Us kwail kirit akwa, awane iamizta. Sunkanane wan awa au sukin uzturuzne kwail kiat kit iamiznazi. 13 Moisés ininta pit pínkihta parachasmin, wan awa an sukin uzturuzne kwail kiarit. Moisés pínkihta parachasmin, Diosne awaruz kwail kiarit aizpa wiantachi. 14 Adánpa kwizpa uztaruzkas Moiséspa an ñancha uztaruzkas, iara, uspa kwail kiarit akwa. Adánpa kwizta uztaruzne Adán kwail kiritkana kwail kiarachi. Adán paiña kwail kirit aizpa wantuza kwaknarakas, Cristone kwiztane at kit wantuza wat namnashina.

15 Nane uruza paas pit kamtanamtus. Une Adán miz kit ñanta kirit piankamarawa. Adán kwail kira akwa, pailta awaruzne iarínazi. Ukas Dios wan awaruza wat kiwainashimtu piankamtawa. Adán kwail kitkas, Diosne awaruza pashinat kit Jesucristora ininta, awaruza kiwainanapa, usparuza watsat milnanapa. Jesucristone Adánkin an wari, Dios Jesús akwa wan awaruza kwisha kiwainashimtu akwa. 16 Maza awa kwail kirit akwa, wan awane parishizanazi. Dios wan awara pashinamtu akwa, usne kwail awaruza wat namninnat kit uspa kwail kiamtu aizpa wat kulnanazi. Adánkin Dios kimtu aizpa anza wari, Dios awaruza paiña iztakin wat namninnamtu akwa. 17 Maza awa kwail kirit akwa, pailta awaruzne iarínazi. Dios wantuza pashinamtu akwa, Diosne Jesucristora piankamtuza sapnat kit uspa kwail kiarit aizpa wat kulnanazi. Dios kimtu aizpa Adánkin anza wari. Diosne Jesucristo akwa usparuza chiyura uzninnanazi.

18 Adán kwail kit akwa, wan awaruzne kwail namat kit uspa kwail akwa parishizanazi. Cristo au akwa irit akwa, aumiza wat kit akwa, Diosne wan Jesucristora nijkulturza wat namninnashina, pailta payukima chiyura uzanapa. 19 Maza awa Dios ininta aizpa mirachi akwa, pailta awaruzne kwail namarit. Sunkana Cristo paiña Papihsh kurunta aizpa kirit akwa, Cristo au akwa wat kit akwa, Diosne awaruza wat namninnashina, uskasa uzanapa.

20 Diosne paiña pit Moisésta ininnara, awa uspa kwail kiarit aizpa an piankamanapa. Awa an akkwan kwail kiamtuasmin, Diosne wan awaruza an akkwan wat kinashira, uspa kwail wat kulnanapa. 21 Minpa pit kaiznamtus. Awa kwail kiashimtu akwa, uspane iarinazi. Sunkanane Dios wan awaruza pashinamtu akwa, Diosne au Anpat Jesucristora au sukin inapa ininta, awaruza wat namninnanapa, uspa kwail wat kultananapa, pailta payukima uzanapa.

Cristora piantuzne kwail kinwachi

6 ¹Aune ¿chima kizanapai? Aune an kwail kitchiwamakpas, Dios aumiza an akkwan wat kinanapa, Dios aumiza an wat kulnanapa. ²Aune mizurainkas sunkana kwail kiasachimakpas. Aune kwail kin chihkashimtumakpas, Dios iztakin kwail kiman. ³Jesucristora piantuzne Cristowa munkasa munnara. Sunkana aune Cristokasa wanmaktitmakpas. Au kwazikasa munkane, aune Dios iztakin Cristora kanpamtuzkanain namtamakpas, us aumiza milashimtu aizpa sappanapa. ⁴Pira win kit Cristo munkasa munarrit akwa, aune ussa kamtítmakpas. Ussa kanpamtuasmin, aune us pashimtu aizpa kintumakpas. Sun akwa aune kwail kitchiwamakpas. Au Taitta Dios kwisha tinta akwa, usne Cristora irittas kakulninta, mamasa uznapa. Sunkana Diosne aumiza kiwainnashina, maiztit awakanain uzanapa, mamaz tuntu uzanapa.

⁵Diosne Cristora wanmakturuza namninnarrit, kwail kishiamanpa. Uskana namtittuzne, uskasa wanmaktittuzne, maizarit, nil uzana, kwail kiaman. ⁶Aune an ñancha miza uzara pianmakpas. Aune kwail kaiznash. Mane Diosne au kwail kiashimtu aizpa kaninta. Cristo kurishta au akwa irit akwa, usne aumiza kiwainamtu, an kwail kiashimanpa. ⁷Awa irikane, usne kwail kin pailtit. Kawarain Diosne mazara maiz kit masas awakanain namnintu, an kwail kishimanpa. ⁸Cristora piantuzne Cristokasa wanmakkarit. Cristo au akwa irit nijkulamtu akwa, aune ma payu uskasa uziznapas pianmakpas. ⁹Cristo irawane, aune Dios Cristora irittas kakulnintit pianmakpas. Katmizna usne mamasa imanazi. Pailta payukima uznazi. ¹⁰Cristo irikane, usne masa piji kwail kirittuz akwa ira. Ma chiyura uztuasmin, Cristone pailta payukima Dios akwa uz, ussa kiwainna. ¹¹Mane une sunkana kiarawa. Umin izizanaka. Mane kwail kin minman. U Cristora wanmaktit akwa, une Dios pashit aizpa kizanaka.

12 Katmizna an sukin uzamtuasmin, aune wan kwail kirit aizpa chihkatpamakpas. Aune chiwazha ayukta kwail kinpa minñashimtu aizpa mirakiwamakpas, sun kwail kimanpa. 13 U ayukta kwail mintu aizpa kiman. Kancha uruza Diosta chihkatpa, wat kianapa. Une an ñamin irit awakanain mazi. Kwiztane Dios uruza uzninara akwa, une Dios wat pashimtu aizpa kiaiznaka. 14 Ma uzamtuasmin, u ayukta kwail minñamtu aizpa kiman. Dios Moisésta paiña inim pit inintakas, sun inim pitne, aumiza mizurainkas watsat mīlnamanazi. Dios aumiza kwisha wat kiwainashimtu, kwail kiamanpa.

Kiwainmumikawa kwinta

15 ¿Aune chima kizanapai? Aune an akkwan kwail kitchiwamakpas. Diosne awaruza wat kiwainnamtuchi, awa sun inim pit miamtu akwa. Dios awaruza pashinamtu akwa, usne awaruza wat kiwainanazi. 16 Une anpatpakas kiwainmumikawakas wat pian. Kiwainmumikane anpat inintu aizpa mimtu. Kwail kishimtumikane paiña kwail anpat inintu aizpa minazi. Sun akwa usne Diostas attishta chanazi. Diosne us inintu aizpa mishimtumikasha wat namninnat kit paiña kwail wat kulnazi. Sun akwa nil uznazi. 17 An ñamin une u kwail anpatta miat kit kwail kiara. Mane Diosta aishtaish kiztus, u na kamtanara aizpa sapparit akwa. U sun watcha miara akwa, une Dios kiwainmuruz namat kit us ininta aizpa kiara. 18 Diosne uruza chihtnara, an kwail kin pashiamanpa. Dios uruza chihtnara akwa, une Diospa kiwaintuz namara, nil uzanapa. 19 U we piankamamtu akwa, nane uruza an kamtanash, ap pit an mianapa. Diosta piankamarachasmin, une sinam chi aizpa kiashit kit akkwan tuntu kwail kiashira. Mane Diosta piankamamtu akwa, une Dios wat inintu aizpa kiarawa, nil uzanapa, Dios pashit aizpa kianapa.

20 U akkwan tuntu kwail kiashikane, une Dios awaruza kurunara aizpa miashitchi. Nil uzarachi. 21 An ñamin kwail kiamtuasmin, une sun kwail akwa mītsal kiat kit chinkas kana kiarachi. Sun kwail kimturuzne paimpa iarinazi, Dios uzkin putnasachi akwa. 22 Dios au kwail kiashit aizpa kanintit akwa, usne aumiza paiña kiwaintuz naminnara. Usne aumiza sinam awakanain namninnamtu, pailta payukima chiyura uzanapa. 23 Kwail kimmikane chinkas sapmanazi, irikane. Usne Dios uzkin uzmanazi. Diosne au Anpat Jesucristora pianuruza uskasa wanmaktuza pailta payukima chiyura uzninnanazi.

Kasara kin kwinta

7 ¹ Une Diosta piantuz mai. Na uruza kaiznamtu aizpa miizana-
naka, uruza inintit aizpa piankamamtu akwa. An sukin uz-
turuzne chiwazha inim miarawa, ianakima. ² Ashampa ampu
mijmikawa kwinta kainanamtus. Ashampa ampu mijmikane
paiña ampukasa uztawa, sunkana inintit akwa. Usne paiña am-
pura kwaisachi. Paiña ampu irikane, sun ashampane sun inintit
aizpa mimanazi, paiña ampu uztuchi akwa. ³ Paiña ampu uzas-
min, mamaz ampukasa yaltane, sun ashampane kwail cham
ashampa i. Ampu irikane, sun ashampane paiña ampura wan-
maksachi. Sun ashampa chiht akwa, usne mamaz ampura mil-
shinai. Suasne usne kwail cham ashampa chi.

⁴ Une Diosta piantuz miizanaka, na kaiztit aizpa piankama-
napa. Cristo u akwa irit akwa, une Moisés inintit aizpa an mi-
rakiwa, u Cristora wanmakkarit akwa. Une Cristo inintu aizpa
kiashina. Dios Cristora irittas kakulnintit akwa, usne aumiza ki-
wainnanazi, paiña wat kal kianapa, us iztakin nil uzanapa.
⁵ Cristora piankamarachasmin, aune au uzashitkanain uzana-
shi. Moisés inintit aizpa izamtukas, aune au kwail kiashimtu
aizpa kamanashi. Kwail minñamtuasmin, aune chiwazha kwail
kishimtu aizpa kianashi. Au kwail kiamtu akwa, aune iarinapas.
⁶ Mane Diosne aumiza chihtnarit, Moisés Judío awaruza ininna-
rit aizpa miamanpa. Ñamin aune sun ininta pit miramakpas. Au-
ne sun ininta pit mainsachimakpas. Paiña Izipul aumiza kiwai-
namtu akwa, mane aune Diosta mĩmtumakpas, watsal uzana.

Awane kwail kiamtu

⁷ ¿Aune chima kizanapai? Mane minpazha Judío awaruza
ininta aizpa kwail i minñashina. Sun ininta pitne kwailchi. Wa-
ri. Sun ininta pit akwa, nane kwail kimika ish pianish. Sun inin-
ta pit pinkihta ka parit: “Patna pashikain.”^p Katmizna nane pat-
na pashimtumika kwail kimtu pianish. ⁸ Sun ininta pit iztuas-
min, nane patna pashimĩztuarau. Sun ininta pit wachiatne, na-
ne sun kwail pura aizpa piankamsachish. ⁹ Na sun ininta pit
piankamtachasmin, nane watsal uztus mintau. Dios ininta aizpa
piankamtawane, nane ap kwail kishit aizpa nijkultau. ¹⁰ Sun

^p7.7 Éx 20.17; Dt 5.21

akwa nane Diostas attishta charau. Dios sun pit nawa uznapa inintakas, nane inintit aizpa kimanamtish. Na sun ininta pit kisachi akwa, nane Diostas attishta charau. **11** Na Dios inintit aizpa kisachi akwa, nane ap kwail kit aizpa nijkultau. Sun akwa nane Diostas attishta charau.

12 Katmizna nane mamasa kaiznamtus: Sun inim pit Diostas at akwa, kwail chi mai. Watchakas watkas mai. **13** Aune “Dios inintit aizpa wari” pianmakpas. Kwail chi. Sun wat inim pit nawa Diostas attishta chaninta. Dios ininta aizpa piankamtawane, nane kwailpa piankamtau. Sun wat inninta pit akwa, nane ap kwail kirit aizpa tailchasachish. Nane Diostas attishta charau. Na kwail kishirit akwa, nane kwisha kwail namtit nijkultau.

Masetne kwailkas watkas kishimtumakpas

14 Aune Dios Sinam Izipul sun inim pit aumiza ininnara pianmakpas. Dios ininta aizpa watkas, nane wan awakanain uz kit kwail kishimtus. **15** Watcha, na kimtu aizpa we pianish. Masetne wat kishimtu aizpa kimanash. Masetne kwail kishitchi aizpa kinash. **16** Na kwail kishimtuchi aizpa kitkima, nane na kwail kimtus nijkultus. Suasne nane Dios inintit aizpa wari kiztawash. **17** Katmizna ap kajchukin kwail wa akwa, nane kwail kishimtus. **18** Ap kajchukin wat wachi pianish. Na wat kishimtukas, wat kisachish. **19** Nane wat kishimtu aizpa kimtuchish. Sunkana nane kwail kishitchi aizpa kimtus. **20** Suasne na sun kwail kishitchi aizpa kitkima, nane kwail kimiztus, kwail ap kajchukin wa akwa.

21 Wan awaruzne nakanain uzamtu. Wat kishimtukas, nane kwailmin kimizish, wat kimtuchin. **22** Nane ap kajchukin watsal kultus, Dios paiña ininta pit nawa milat akwa. Sun pit mishimtus. **23** An sukin uzasmin, nane mamaz tuntu pitkas nawa inintu pianish. Sun mamaz pitne nawa kwail kin kinintu. Sun kwail kimanash minkane, nane sun mamaz pit mimtu, kwail kinpa. Sun mamaz pitne na mintu aizpa inintu, na kwail kinpa.

24 Sun akwa nane kwisha tayalish, wan awakana kwail kishimtu akwa. Anne tailchasachish. ¿Minmika nawa kwainshina, na kwail kimanpa? **25** Diosmin nawa kiwainshina, kwail kin kishimanpa, kwail minmanpa. Katmizna nane Diosta aishtaish kiztus, Dioskas au Anpat Jesucristokas nawa kiwainshimtu akwa, us kuruntu aizpa minapa. An sukin uztuasmin, nane

kwail kin minshimtus. Minpa pit kainanamtus. Ukas nakas Dios inintit aizpa mirawamakpas, kwail kimanpa.

Diospa Sinam Izpulne awaruza miza uzna kurunnamtu

8 ¹ Mane Cristo au akwa irit akwa, Diosne Jesucristora pian-tuza, Jesucristokasa wanmakturuza, uspa kwail akwa pa-rishizninmanazi. ² Sinam Izpulne Jesucristora piantuza mamaz tuntu uzninnat kit usparuza Jesucristokasa wanmakkamtu. Sun akwa usne nawa kwail kimanpa kiwainamtu. Mane nane ap kwail kirit akwa parishizmanash. ³ Awa Moisés inintit aizpa kiasachi akwa, uspane uspa kwail akwa wat namarachi. Dios-min awaruza wat namninashina. Diosne paiña painkulta au su-kin ininta, apa kwail awa uztukin uznapa. Jesús an sukin awa-kanain uztuasmin, awakanain uzta, kwail kitchin. Usne awa akwa irit, Dios au kwail kiarit aizpa kaninnanapa. ⁴ Dios au akwa sun kirit akwa, Sinam Izpulne aumiza kurunnat kit Dios inintit aizpa mininnamtu. Diosta pianchiruzne Dios ininta aizpa miasachi.

⁵ Diosta pianchiruzne chiwazha ayukta kwail minñashimtu aizpa kiamtu. Sinam Izpul kuruntu aizpa mĩmturuzne us kurun-tu aizpa minñat kit ka kiashimtu. ⁶ Kwail kishiamtu aizpa min-turuzne Diostas attishta uzanazi. Diosne Sinam Izpul kuruntu aizpa kishimturuzna pailta payukima kalpain uzninnanazi, Dios-kasa uzamtu akwa. ⁷ Kwail kishimturuzne Diosta aliz mai, mi-zurainkas Dios inintu aizpa miashimtuchi akwa. ⁸ Chiwazha kwail kin minturuzne Dios pashimtu aizpa kiasachi.

⁹ Une chiwazha kwail kiashimtuchi. Minminkas uruza kwail kin kininsachi. Une Sinam Izpul kuruntu aizpa mĩamtu, Sinam Izpul u kajichukin uztu akwa. Cristowa Sinam Izpul mijchiruz-ne Cristowa kwal namamtuchi. ¹⁰ Au kwail kiarit akwa, aune wan awakanain iarirnawas. Au kwail kiaritkas, Sinam Izpulne Cristora piantuza uzninnanazi. Paiña Izpulne au kajichukin uz-tu akwa, usne au izpultuza uzninnat kit Dios iztakin aumiza nil namninnashina. ¹¹ Diospa Izpulne Cristowa ña irittas kakulnin-ta pianmakpas. Sinam Izpulmin aukasa uz kit au ña minpa pa-yura irittas kakulninnanazi. Sinam Izpul au ayukta uztu akwa, Diosne au ña mamasa uzninnanazi.

¹² Sun akwa, Diosta piantuz miizanaka. Aune Dios Izpul au-miza kuruntu aizpa mirawamakpas. Aune au kwail minñamtu

aizpa kitkiwamakpas. **13** Kwail kin minturuzne watcha iat kit Diostas paimpa uzanazi. Dios Izpul u ayukta uztu akwa, usne uruza tinta kiwainanazi, kwail kiamanpa.

14 Diosne paiña Izpul kuruntu aizpa mishimturuzna paiña kwal namnashina. **15** Diosne aumiza paiña Sinam Izpulta milanarit, ussa ishkumanpa. Sinam Izpulne aumiza paiña pashparuzkanain kwininna namtu. Dios aumiza paiña kwal namnintit akwa, aune “Diosne au Taitta i” kiziznapas. **16** Diospa Sinam Izpulne au izpulkasa wanmaktu, au Diospa kwal makpas piankamninnanapa. **17** Dios aumiza paiña kwal namarit akwa, aune Dios aumiza kin namtit aizpa sapiznapas. Aune Cristokasa Dios wan watsarit mij aizpa sapiznapas. Aune, Cristokana parishizturuzne, uskasa chiyura wat uziznapas.

Dios kin namtit aizpa sappiznapas

18 Ma an sukin uzamtuasmin, aune parishiziznapas. Awa an sukin parishiztukas, Diosne Diosta piantuza wat kiwainnanazi, kwisha watsal puranpa. An sukin parishizamtukas, aune mamaz payura Dios iztakin anza watsal manapas. **19** Dios an sura uzutuza paiña kwal namninnashimtu akwa, uskas usparuzna maiznat kit wat namninnanazi. Suasne awane Dios an su saritkin wat kianazi. Aune tiriztawamakpas, Dios wan sarit aizpa maiznakima. **20** An ñancha awa kwail kirit akwa, wan Dios an sukin sarit aizpa maizarit. Makima aune tiriztumakpas, Dios wan chiwal wat sanakima. **21** Makima wan sarit aizpa iamtu. Mamaz payura Diosne wan sarit aizpa maizninnanazi, mamasa iamanpa. Dios awaruzna paiña kwal namnintawane, usne wan au sukin sarit aizpa mamasa wat namninnanazi. **22** Aune wan su saritkin parishizamtu pianmakpas. Makima wanne ashampa pashpa miltukanain naizamtu, ishtu kanakima. **23** Wan an sukin sarit aizpa parishiztukas, aukas parishiztumakpas. Dios an ñancha paiña Sinam Izpulta aumiza milanaritkas, aune parishiz kit ayukta pihshaamtumakpas, Dios aumiza paiña pashpakanain sapnakima. Dios aumiza paiña kwalkanain kwira kinamtu akwa, aune paiña kailtu payu imparain tiriztumakpas, aumiza irittas kakulninnanapa, uskasa uzana. **24** Diosne aumiza watsat milnara, au ussa nijkulamtu akwa. Ussa nijkulamturuzne imparain tirizamtu, us wan kin namtit aizpa sapnakima. Dios kin namtit aizpa saptamikane an sapna tiriztuchi, me us wan

saptit akwa. **25** Au wan kin namtit aizpa sappamtuchi akwa, aune imparā imparain tirizat kit tailchamtumakpas, sun sapanakima.

26 Au Diosta tirizamtuasmin, Sinam Izpulkas ayukta tinta pihshat kit au akwa Diosta mamaz tuntu paikumtu. Au Diosta paikwan we pian akwa, Sinam Izpulne aumiza kiwainat kit Diosta au akwa nil paikumtu. **27** Dios au ayuk kaijchukin mintu aizpa pianasmin, uskas paiña Izpul mintu aizpa pian. Sun akwa Sinam Izpulne au Diosta piantuz akwa Diosta paikumtu, us Dios pashimtu aizpa wat pian akwa.

Aune anuppaiznapas

28 Aune Dios kimtu aizpa pianmakpas. Diosne au ussa pashimturuzā wat kiwainamtu, chiwazha aumiza kimtu aizpa watsal puznapa. Diosne aumiza akwanat kit au akwa sunkana kimtu, us pashimtu aizpa kianapa. **29** An su sarachasmin, Diosne au ussa nijkulamturuzā nanara, paiña painkulkanain nama-napa, Cristo uztakanain uzanapa. Diosne “Cristo an tinta i” kiz kit wan ussa piantuzā sapanamtu, paiña kwal namanapa. **30** An su sarachasmin, Diosne au ussa pashimturuzā nanarit. Suasne usne aumiza wat uzanapa akwanat kit au kwail kiarit aizpa kaninnara. Dios aumiza akwanamtuasmin, usne aumiza wat awakanain namninnat kit au kwail kiarit aizpa wat kulnarit. Au kwail kiarit aizpa wal kulnarit akwa, Diosne aumiza paiña Painkul uztukin watsal uzninnanazi.

31 ¿Aune chima kizanapai? U na kaizta aizpa nijkulamtuasmin, ma pitchin miizanaka. Dios paiña izmuruza kiwainamtukima, minminkas aumiza anuppasachi. Aune kwailtuza ishkuamanapas. **32** Aune Dios paiña painkulmin au akwa irinpa chihkarit pianmakpas. Sunkana usne au we aizpa aumiza kain milananazi, us pashimtu aizpa kianapa. **33** Minminkas “Dios narittuza wat kulmanazi” kaizsachi, Dios usparuza me wat kulnarit akwa. Diosne paiña narittuza maizninnat kit uspa kwail kiarit aizpa kaninnara. **34** Minminkas “usparuza kwail kiarit” parasachi, Cristo au kwail akwa irit akwa. Kwiztane Diosne ussa irittas kakulninta. Mane usne Dios iztakin, Dios inintukin, uz kit au akwa Diosta paikumtu. **35** Cristone aumiza pailta payukima pashinanazi, pailtachin. Minpazha aumiza parishiznintukas, usne aumiza pashinanazi. Minpazha aumiza ilnamtukas, usne au-

miza pashinanazi. Au yak kiamtukas, usne aumiza pashinanazi. Au pīn we mijkas, usne aumiza pashinanazi. Au uzkin kwail purakas, usne aumiza pashinanazi. Awa aumiza piantamtukas, usne aumiza pashinanazi. **36** Sunkana Dios pitta ka parit:

“Awane aumiza aliz kulat kit ussa piantuza pailta payu piantanashimtu.

Uspane pirikuruza piantamtukanain aumiza piantanashimtu.”^q

37 Au sukin chiwazha kwail parishiztuasmin, Cristone aumiza pashinat kit kiwainnashina, wan kwail anuppanapa. **38** Nane Dios aumiza watcha pashinamtu pianish. Au irakas, au irachikas, Diosne aumiza pashinamiznazi. Ángeltuzkas kwail chiyura mikwaruzkas aumiza Dios uzkis ukkasachi. Usne aumiza pashinamiznazi. Ñamin au kwail kiaritkas, Diosne aumiza pashinamiznazi. Mamaz payura mamaztuz aumiza kwail kishiamtukas, Diosne aumiza pashinamiznazi. Chiyura tinta ininturuzne aumiza Dios iztakin ukkasachi. Usne aumiza pashinamiznazi. **39** Chiwazha chiyu kwashta uztuzkas chiwazha chiyu pulamal uztuzkas aumiza Dios iztakain ukkasachi. Diosne aumiza pashinamiznazi. Dios wan chiyurakas wan au sukin sarakas, usne aumiza chihkamanazi. Dios au Anpat Jesucristora au sukin ininkane, Diosne yawa aumiza pashinamtu annara.

Diosne Israel awaruza nanarit

9 ¹ Na Cristora wanmaktit akwa, nane Cristora pianmika ish. Nane pirail aptuchish. Diospa Sinam Izpulne nawa kurun kit na watcha kaiztu aizpa piankamnintu. ² Nane Judío awa akwa kwisha tayaltus. Nane ap Judío kwal akwa ap kajchura kwailpazha mintus. ³ Nane Diosta paikwanpain ish, Dios nawa parishizninnapa, ap Judío kwaltuza parishizninamanpa. Dios ap Judío awaruza sapanashitne, Cristora nijkulashitne, usne nawa paimpa tashina, na Cristokasa uzmanpa. ⁴ Diosne usparuza Israel awa munnara. Usne usparuza paiña pashpakanain kwira kinarit. Israel awa pul suwara chamtuasmin, usne usparuza yawa watsal Dios i piankamninnara. Usne usparuza akkwan pijiki-ma kin namnara, watsat milnanapa, Dios akwa uzanapa. Usne usparuza Sinaí inkalkin kwinta kinara, us inintit aizpa sappat

^q 8.36 Sal 44.22

kit mianapa. Usne usparuza wanmakninnara, ussa wakpuj wainñanapa. Usne usparuza kwisha akkwan kin namnara, wat-sat milnanakima. ⁵ Abrahamkas, Isaackas, Jacobkas uspa ñamin kwal mazi. Anza tinta Cristokas Judío awa kwal azi. Dios Judío awaruza wat kinarit akwa, uspane Jesússta sapparachi. Sun akwa aune “Cristone Dios i” kizshinamakpas. Diosta “kwisha wari” kizanapas, Cristo wantuzakas wan sarittuzakas innamtu akwa.

⁶ Akkwan Israel awa Cristora nijkularachikas, Diosne usparuza paiña pitkin namtit aizpa kinarit. Wenamtachi. Dios Israel awaruza paiña kwal namninnaritkas, usne an akkwan awaruza nanara, paiña kwalkas namanapa. ⁷ Sunkana wan Abraham pashparuzne Diospa kwal chi mai. Diosne Abrahamta ka kaizta: “Isaacpa pashparuzmin up kwal namanazi,”^r ka parit. ⁸ Katmizna wan pashpa au sukin kawimturuzne Diospa kwal namamanazi. Diosne Abrahamta maza painkul kawirana kin namta. Abrahamne Dios ininta aizpa mira. Diosne ma payu Dios kin namtit aizpa mimturuza paiña kwal namninnanazi. ⁹ Sunkana Diosne sun pit Abrahamta ka kin namta: “Maza año paituchasmin, Sarane, up ashampane, maza painkul milnazi, Dios nu akwa tinta kimtu piankamnapa.”^s

¹⁰ Mamaz kwinta kainanamtus. Isaacne, au ñamin irit papihshne, maza ashampara, Rebecara milta. Kwiztane Rebecane masain paas painkul mil kit kawirara. ¹¹⁻¹³ Paas pashpa miltachasmin, uspa paas watkas kwailkas kirachasmin, Diosne Rebecara ka kainara: “Esaú an ñancha kawinazi. Kwizta kawiramikane, Jacobne, paiña aimpish ilapamikara innnazi,”^t ka kizta. Dios pinkihtakas ka parit: “Nane Jacobta an pashimtus. Esaúra-kas an we pashimtus,”^u ka kizta. Sun paas pashpa kawirachasmin, Diosne sun pit ka kainara. Awa chinkas kitchasmin, Diosne awaruza nanamtu. Diosne sunkana min kit kimtu.

¹⁴ ¿Aune chima kizanapai? Dios paas painkultas mazara naritkas, aune mizurainkas Dios “kwail i” kaizsachimakpas. Dios wari pianmakpas. ¹⁵ Diosne Moisésta ka kaizta: “Mamazta kiwainshitne, mamazta kiwainshinas. Mamazta wat kishitne, mamazta wat kishinas,” ka kizta.^v ¹⁶ Awa Diosta ussa wat kinpa

^r9.7 Gn 21.12 ^s9.9 Gn 18.10, 14 ^t9.12 Gn 25.23

^u9.13 Mal 1.2-3 ^v9.15 Éx 33.19

saimtukas, Diosne ussa sapmanazi. Awa Dios ussa wat kinpa tinta kal kintukas, Diosne ussa sapmanazi. Diosmin awaruza nanamtu, awaruza wat kiwainanapa. ¹⁷Diosne pinkihta ka patnin kit Faraón̄ta, Egipto sura katsa mikwasha, ka kaizta: “Nane nua narau, ma payu uznapa, ap tinta kal piankamnapa. Suasne na kimtu akwa, akkwan an sukis awaruzne nawa piankamnanazi. Kwiztane awane na tinta ish piankamanazi.”^w ¹⁸Katmizna Dios minpazha awa wat kiwainshitne, usne wat kiwainshina. Diosne Diosta mikaintuza maizninnashina, Dios kaiztu aizpa kiamanpa.

¹⁹Minpazha nawa ka kaizshina: “Dios sunkana kimtune, Diosne awaruza ilnasachi, Dios usparuza nijkulninnarachi akwa,”^x ka kizshina. ²⁰Nu awakanain akwa, nune Diosta sunkana sinkasachi. Nune “Dios kit aizpa kwail i” kizsachi. Pil pail sammika pail samtukana, Diosne nua samtu. Mizha. Pil pail sammikane akkwa tuntu pail sashina. Pailne pail sammikasha “nu nawa sunkana sanawachi,”^y kiznawachi. ²¹Pail sammikane sam pil, pijtam pil, kwiat kit pail sashina. Pail samtuasmin, pail sammikane sun pilkasain masetne watsal pail sashina, awa izanapa. Masetne usne mamaz tuntu pail sun pilkasain samiztu, kumira ainat kit nailna. Kawarain Diosne us kishit aizpa awaruza kinashina.

²²Dios us kishit aizpa kishimtukas, usne awaruza Dios tinta i piankamninnat kit kwail kimtuza parishzninnanazi. Dios usparuza uspa kwail akwa ilnashimtukas, usne akkwan añokima kwail kimtuza impara imparain tailchanara. ²³Diosne impara imparain usparuza kurunnamtuasmin, uskas usparuza yawa Dios watsal iztit piankamninnara. Usne usparuza wat kiwainat kit an ñamin sun wat mintit aizpa aumiza kaiznanara, us uzmukin watsal uzanapa. ²⁴Diosne aumiza akwanara, aumiza watsat milnanapa. Usne Judío awaruzakas Judío chi awaruzakas akwanara. ²⁵Sunpa Diosne Oseasta pinkihta panin kit ka kaizta:

“Nane ap kwal chiruza akwananash, ap kwal namninnapa.

Nane nawa pashinamtuchiruzo akwananash,
usparuza pashinana.”^z

^w 9.17 Éx 9.16 ^x 9.19 Éx 9.16 ^y 9.20 Is 29.16; 45.9

^z 9.25 Os 2.23

26 “Diosne Judío chi awaruza, sun sura uztaruza,
‘une ap kwal chi’ kizta.

Kwiztane Diosne, chiyura tinta uztumikane, usparuza
akwanat kit paiña kwal namninnanazi.”^a

27 Isaíasne, Dios pit kainammikane, Judío awawa ka kaizta:

“Israel awane akkwan pashpa kawianazi.
Uspa pashparuzne pi ksukana wanmakkanazi.
Wantuza wiansachikas, Diosne akkwan watsat
milnamanazi.

28 Au Anpatne me anpain pamtui, wan sukin uztuza uspa
kwail kiamtu aizpa kainanapa,
usparuza parishzninnanapa.”^b

29 An ñamin Isaíasne ka kaizta:

“Diosmin an tinta mika i.
Dios aumiza paiña kwal namnintakiatne,
aune Sodoma pipulukin uztaruz iarítkanain iarishina-
makpas.

Aune Gomorra pipulukin uztaruz iarítkanain
iarishinamakpas. Sun payuin, Diosne usparuza
anuppanara, pailnakima.”^c

Israel awakas Dios watsal pitkas

30 Katmizna na kaiztu aizpa mamasa mirain. Diosne Judío chi awaruza us iztukin nil namninnat kit uspa kwail kiarit aizpa wat kulnara. Judío chi awa Diosta sayarachikas, Diosne usparuza sapnara, ussa nijkularit akwa. 31 Judío awaruzne sunkana kiashitchi. Uspane Moisés ininta aizpa mishiara, Dios usparuza nil namninnanapa, Dios uspa kwail kiarit aizpa wat kulnanapa. Sun akwa Diosne usparuza sapnarachi. 32 ¿Diosne chikishma usparuza sapnarachi? ¿Diosne chikishma usparuza wat kulnarachi? Judío awa Diosta nijkularachi akwa, Diosne usparuza nil namninnarachi. Uspane Moisés ininta aizpa kishiara, Dios usparuza sapnanapa. Sunkana chi. Katmizna uspane ñanta kiarit. Cristo kurishta irit akwa, Judío awaruzne Cristowa miashitchi. Sun kammu pit sapparachi. Awa miwarain mitti ukta patkulam-

^a 9.26 Os 1.10 ^b 9.28 Is 10.22-23 ^c 9.29 Is 1.9

tukanain, Judío awaruzne Cristo akwa patkulat kit Cristora nakpinnara. ³³Mamasa Isaíasne pinkihta panin kit ka kaizta:

“Mirain, nane Israel sukin mazara ukkana tanash.

Awaruzne Cristo akwa, sun uk akwa, mitti patkulanazi. Awaruzne Cristo akwa, sun uk akwa, nijkulamanazi.

Ussa, an ukta, nijkulturuzne mizurainkas Dios iztakin mitsal kiamanazi, Dios usparuza nil namnarit akwa.”^d

10¹ Cristora piantuz Roma pipulukin mirain. Na ap kajichukin Judío awaruza pashinamtu akwa, nane Diosta paikumtus, Judío awaruza watsat milnanapa. ²Nane Judío awa Diosta kiwainashimtu pianish. Diosta kiwainashimtukas, uspane miza Diosta sayana we pian mai. ³Uspane Dios kurunnarit aizpa miashimtuchi, Dios usparuza wat kulninnanapa. Uspane we pian mai. Uspa kal kiashit akwa, usparuzpain wat namninnashira. Uspane Diosta nijkulashitchi, Dios usparuza sapnat kit nil namninnanapa. ⁴Dios Judío awaruza Moisés inintit aizpa chihkanaritkas, Cristone sun inim pit pailninta, uspa Cristora piantuza nil namninnanapa. Diosne Cristo kirit aizpa nijkulturuzapain wat kulnanazi.

⁵ Mazantuzne sunkana minñashina: “Nane Moisés ininta aizpa kinash, Dios nawa nil namninnapa.” Awa ka minñamtukas, Moisés ka parit: “Wan inintit aizpa kishimtumikane wan inim pit kapal mirawa, pailta payukima uzanapa,”^e ka parit. ⁶ Awa sunkana kisachikas, Diosne Jesucristo kirit aizpa nijkultumikasha nil namninnazi. Cristora nijkultumikane Moiséskana ka kaizmanazi: “Mazane chiyura nura-wai, Cristora apa kailninnapa, aumiza Dios pit kainanapa, Cristo aumiza watsat milnanapa.”^f Sunkana minman, us me apa at akwa. ⁷ Cristora nijkultumikane Moiséskasa ka kaizmanazi: “Mazane irit izpul tukin kihstawai,” Cristora sayana. Sunkana minman, Cristo irittas kakultit akwa. ⁸ Dios pitkin parit aizpa nijkulturuzne Moiséskasa ka kaizashina: “Aune Dios pit mijmakpas. Aune sun pit izshinamakpas. Au kajichukin minshinamakpas.”^g Aune sun pitmin

^d9.33 Is 8.14; 28.16 ^e10.5 Lv 18.5 ^f10.6 Dt 30.12

^g10.8 Dt 30.12-14

uruza kainammtumakpas, awa Cristora nijkulanapa. ⁹ Minpazha “Jesús ap Anpat i” mamaztuza kiztune, Diosne ussa watsat milnazi. Kawarain minpazha paiña kaijchukin Dios Jesústa irittas kakulninta nijkultune, Diosne ussa watsat milnazi. ¹⁰ Minpazha paiña kaijchukin Cristo kirit aizpa nijkultune, Diosne ussa sap kit wat kulnazi. Sunkanain minpazha Cristora nijkultus mamaztuza kaiztune, Diosne ussa nil namnin kit watsat milnazi.

¹¹ Mazane Dios pinkihta ka Cristowa parit: “Ussa nijkultumikane mizurainkas Dios iztakin mitsal kimanazi, Dios ussa nil namtit akwa.”^h ¹² Wan awane, Judío awaruzkas Judío chi awaruzkas, Dios iztakin kawarain mai. Wan Cristora nijkulturuzne maza Anpatmin mijmai. Sun akwa Diosne ussa paikumturuza kwisha wat kiwainnanazi. ¹³ Diosne paiña pinkihta ka panintit: “Diosne au Anpatta paikumturuza watsat milnanazi.”ⁱ ¹⁴ Cristora paikumtuchasmin, awane ussa nijkularawa. Ussa nijkultuchasmin, awane Cristowa miarawa. Cristowa mimtuchasmin, Dios pit kainammikane uspa uzkin itpa, sun Cristowa pit kamtananapa. ¹⁵ Dios pit kainammika uspa uzkin imtuchasmin, awane ussa inintawa. Dios pinkihta ka parit: “Dios watsal pit kainammika pianakane, awane kwisha watsal kianazi, Dios watsal pit miamtu akwa.”^j

¹⁶ Mazantuz sun pit miamtukas, wanne Dios watsal pit izkiamtuchi. Sunkana Isaíasne pinkihta parit: “Anpat, akkwanne na kaiztit aizpa miarachi.”^k ¹⁷ Sunkana awane sun watsal pit miarawa, nijkulanapa. Dios pit kainammikane Cristowa pit awaruzka kamtanamtu, awa sun pit mianapa.

¹⁸ Mizhain. Judío awa sun Cristowa pit miarakas, uspane miashitchi. Watcha, sun pit miara. Dios pinkihta ka panintit: “Dios pit kamtamturuzne awa uztukin kainana iara, awa sun pit mianapa.

Uspane wan suwara iat kit sun pit awaruzka kainanara.”^l

¹⁹ Mizhain. Judío awa sun watsal pit miarakas, uspane watcha miashitchi. Mamaz awaruz sun pit miarachasmin, ñancha Moisésne sun pit pinkihta ka parit:

^h 10.11 Is 28.16 ⁱ 10.13 Jl 2.32 ^j 10.15 Is 52.7 ^k 10.16 Is 53.1
^l 10.18 Sal 19.4

“Na Judío chi awaruza ap kwal namninnamtu akwa,
 Judío awaruzne uspawa kwail paraanazi.
 Sun Judío awaruzne kwisha pilchapuzanazi, Dios
 Judío chi awaruza, we mimturuza, sapnarit
 akwa.”^m

20 Kwiztane Isafáskas Dios kaizta aizpa pinkihta para:

“Nane nawa sairachiruzá sapnanash.

Nane nawa akwatchiruzá akwananash, nawa
 piankamanapa.”ⁿ

21 Isafáskas Dios Judío awaruzpa kaizta aizpa ka parit:

“Nane payu aizpa Judío awaruza akwanarau, nawa
 mianapa.

Na usparuza nawa kaiyanapa akwanarítkas, uspane
 na usparuza kaizta aizpa miashitchi.”^o

Dios Israel awaruza nanara

11 ¹ Mane mizhain. Minpazha Dios au Judío awaruza kwai-
 narit kaizashina. Diosne paiña kwaltuza Israel awaruza
 mizurainkas kwainarachi. Nakas Israel awa ish. Abrahamkas
 Benjamínkas ap ñamin irit kwal mazi. ² An ñamin Diosne Israel
 awaruza piankaminnat kit usparuza nanarit, paiña kwal nam-
 ninnanapa. Diosne mizurainkas paiña kwaltuza, Israel awaruza,
 kwainarachi. Elíaspa kwinta Dios pinkihta parit aizpa nijkuliza-
 naka. Diosta tinta paikumtuasmin, Elíasne Israel awaruza aliz
 kul kit Diosta kaizta: ³ “Anpat mizha. Sun Israel awaruzne up pit
 kainammturuza piantanarit. Uspáne awa Diosta wakpuj wain-
 turuza piantaara. Uspáne uspa Diosta paikumkin azpianara. Na-
 ne mazain nukkultit ish. Mane uspane nawa, nua nijkultumika-
 sha, up pit kainammikasha piantaashipus ish.”^p ⁴ Sunkana
 Diosne Elíasta sinkara: “Nane an siete mil wakpuj wainturuza
 watsarit mijash. Uspáne Baal muntitmikasha, dios chimikasha,
 kukaizamtuchi. Uspáne Baal uzkin wakpuj wainñamtuchi.”^q
⁵ Kawarain ma payu mamaz Judío awaruz Diosta wanmakkam-
 tu. Diosne akkwanchiruzá nanat kit aumiza wat kinashimtu.
⁶ Dios usparuza nanarit akwa, usne usparuza wat kishinarit. Us-
 pa wat kal kiarit akwa, Diosne usparuza nanarachi. Diosne min-

^m 10.19 Dt 32.21 ⁿ 10.20 Is 65.1 ^o 10.21 Is 65.2

^p 11.3 1R 19.10, 14 ^q 11.4 1R 19.18

minkas sapnamtuchi, awa wat kal kiamtu akwa. Usne awaruza kain kiwainnat kit usparuza wat kishinamtu.

⁷Sunkana kirit. Judío awaruzne Dios pashimtu aizpa kiara-chi. Judío awaruzne wat kal kiashira, Dios usparuza sapnanapa. Sun akwa, Diosne usparuza nil namninnarachi. Dios akkwan chin narittuza wat kinaritkas, Diosne mamaz Judío awaruza us kuruntit aizpa kwayanapa kininnara. ⁸Dios pinkihta ka parit:

“Diosne usparuza mimituchiruzkana, nijkultuchiruzkana, namninnara.

Makima uspane Diosta piankamasachi.

Uspane kasu izsachiruzkana namarit, Diosta piankamamanpa.

Uspane misachiruzkana namarit, Diosta piankamamanpa.”^r

⁹Davidkas Dios pinkihta ka kaiztu:

“Nane Diosta paikumtus, Diosta aliztuza naizanapa, ussa miamtuchi akwa. Wan Judío awawa pishta izamtuasmin, uspane ‘aune kwisha wat makpas’ minñara.

Uspa Diosta chihkarit akwa, Diosne usparuza ilnanazi.

¹⁰Diosne usparuza kamtachiruzkana namninnanazi, Diosta piankamamanpa.

Diosne usparuza uspa kwail kiarit akwa ininnanazi.”^s

Diosne Judío chi awaruza watsat milnanamtu

¹¹Judío awa Dioskis paimpa iaritkas, uspane Dioskis pailta payukima paimpa uzamanazi. Mamaz payura Diosne usparuza watsat milnanazi. Judío awa Dios ininta aizpa miarachi akwa, kwail kiarit akwa, Diosne Judío chi awaruza akwanara, usparuza watsat milnana. Sun akwa Judío awaruza kiwainashimtu, Judío chi awa sapparit aizpa pashianapa. ¹²Judío awa kwail kiat kit Dioskis paimpa iarit akwa, Diosne akkwan ñan awaruza wat kinamizta. Judío awaruz Dios usparuza milashimtu aizpa sapparachikas, Diosne pampa Judío chi awaruza sapnat kit watsat milnara. Mamaz payura minpazha Judío awaruzne Diosta piankamna kaiya-

^r 11.8 Dt 29.4; Is 29.10 ^s 11.10 Sal 69.22-23

nazi. Judío awa Cristora nijkulakane, Diosne Judío awaruzpa akwa, an akkwan awaruza kwisha wat kinanazi.

13 Mane nane uruza, Judío chi awaruza, paranamtus. Dios nawa paiña inintamika namnintit akwa, us nawa Judío chi awaruza Dios watsal pit kainana inintit akwa, nane u akwa tinta kal kishimtus. 14 Ap Judío awa kwal ma payu Cristora nijkulamtuchikas, nane u akwa tinta kal kimtus, uspa Dios uruza milanarit aizpa pashianapa, uspa ukanain Cristora nijkulashianapa. Suasne Diosne mazantuz Judío awaruza watsat milnanazi. 15 Dios akkwan Judío awaruza kwainaritikas, usne pampa ñan awaruza sapnat kit paiña izmuruz namninnara. Judío awaruz Cristora nijkularawane, Diosne usparuza sapnat kit pailta payukima uskasa uzninnanazi.

16 Awa pan iltane, an ñancha wat puztane, wan kwizta pankas wat puzashina. Ti mujtit sam wajne, tikas sam kun. Abrahamne sunkana i. Diosne Abrahamta nat kit Judío kwal namninta. Abraham wat akwa, Abraham Diospa kwal akwa, Abrahampa pashparuzkas Diospa kwal mai. 17 Judío awaruzne ti sailkana mai. Diosne usparuza ti sailkana wat ti kwalkis wizmalninnara. Sunkanane Diosne akkwan Judío awaruza kwainarrit. U Judío chi awaruzne mamaz ti sailkana mai. Diosne uruza mamaz ti sailkana piznat kit wat ti kwalta ayukta pusninnara, sua chikkanapa. Sun akwa u Judío chi awaruzne Dios Judío awaruza kin namnarit aizpa sappashina, uruza wat kiwainnana-pa. 18 Dios Judío awaruza kwainaritikas, u Judío chi awaruzne Judío awakin anza wat chi. Uspa u nakmaltit ti sailkana mai nijkultain. Une Judío awaruza Diosta piankamninnarachi. Kancha Judío awaruzne Judío chi awaruza Diosta piankamninñara.

19 Une ka kaizashina: “Diosne usparuza, ti sailkana, nakpalnarit, aumiza, Judío chi awaruza, sapnana, uspa nakpalnaritkin pusninnana.” 20 Nane “sunne watcha i” sinkanash. Sun Judío awaruz Diosta nijkularachi akwa, Diosne usparuza, ti sail nakpaltitkana kwainarrit. U Diosta nijkulamtuasmin, Diosne uruza, paiña kwalkanain, watsarit milnanazi. Katmizna “aune Judío awakin anza watmakpas” minñanachi. Uruzpain izarawa. 21 Judío awa Diosta nijkularachi akwa, Diosne usparuza ti sailkana nakpalninnat kit kwainara. Judío chi awaruz Diosta nijkulamtuchine, Diosne ti sail nakpaltitkana usparuzakas kwainanazi. 22 Dios mazantuza wat kinamtukas, usne minpazharuza ilnana-

zi. Diosne ussa kanparachiruz, sun Judío awaruza, ilnat kit kwainarít. Diosne uruza, Judío chi awaruza, wat kinarít, ussa kanpaarít akwa. U Diosta miashimtukine, Diosne uruzakas kwainanazi, uruza ilnana. **23** Judío awa Diosta kaiyakane, Diosta mamasa nijkulakane, Diosne usparuza piznat kit mamasa sapnanazi, ti sail ti kwalta pusnintukanain. Dios tinta akwa, usne Judío awaruza sapnashina, pakmaltit sail ti kwalta pusnintukana, mamasa uzninnanapa. **24** Mamasa sun pitmin kainanash. Diosne uruza, Judío chi awaruza, paiña kwal chiruz, sapnat kit paiña kwal namninnara. Sunkanane Diosne Judío awaruza, paiña kwal kwairittuza, mamasa sapnashina, Dioskasa uzanapa. Judío chi awaruzne sun kwail ti sailkana mazi. Diosne usparuza sapnara, sun kwail ti sail wat ti kwalta pusninnamtukanain. Judío awaruzne wat ti sailkana mai. Judío awa Diosta nijkularachi akwa, Diosne usparuza ti sailkana nakpalnat kit kwainarít. Usne usparuza, Judío awaruza, mamasa sapnashina, paiña kwal mamasa namanapa.

Diosne Judío awaruza kakultananazi

25 Diosta piantuz, miizanaka. Ñamin awane Dios kamtarít aizpa piankamarachi. Nane uruza sun kamtam pit kainanamtus, u “Judío awakin anza wat makpas” minñamanpa. Minpazha Judío awaruz Dios kaizta aizpa miashitchikas, anpane Diosta miannazi. Judío chi awa Diosta kapal piankamarawane, Judío awaruzne, Dios narittuzne, Diosta piankamamiznazi. **26** Sun kirikane, Diosne akkwan Judío awaruza watsat milnanazi. Dios pinkihta ka parit:

“Watsat milmumikane chiyuras anazi.

Usne Judío awa kwail kiarít aizpa sinam sananazi.”^t

27 Mamasa Diosne paiña pinkihta kaizta:

“Nane usparuza uspa kwail kiarít aizpa wat kultana namnarau.”^u

28 Judío awa Dios watsal pit miashitchi akwa, Judío awaruzne Diosta aliz kularít. Katmizna Diosne paiña pit uruza, Judío chi awaruza, ininnara, u Diosta piankamanapa. Dios Judío awaruza mama aliz kulnaritkas, Diosne usparuza mama pashinamtu, uspa ñamin papihshtuza akkwan kin namnarít akwa. **29** Dios

^t **11.26** Is 59.20-21 ^u **11.27** Is 27.9; Jer 31.33-34

mizurainkas maiztuchi akwa, paiña Judío awaruza kin namtít aizpa kinanazi. Usne usparuza milanarit aizpa nakamanazi. Usne wan akwarittuza wat kinanazi. ³⁰ An ñamin une, Judío chi awaruzne, Dios kaizta aizpa miashitchi. Sun payu Judío awaruz Dios kaizta aizpa miashitchiasmin, Diosne uruza, Judío chi awaruza, wat kishinamtu. ³¹ Sunkanane Judío awaruz Dios kaizta aizpa miashitchi akwa, Diosne uruza wat kin minta. Mamaz payura Diosne usparuza, Judío awaruza, sapnat kit ukasa wat kinanazi. ³² Wan awa Diosta miarachi akwa, Diosne wan Judío awaruzakas wan Judío chi awaruzakas uspa kwail kiarit aizpa piankamninnamtu. Awa Diosta nijkulashikane, Diosne wan awaruza kawarain sapnat kit wat kiwainnanazi.

³³ Anne piankamtain:

Diosne wantuza kwisha wat kishina, us wan awara pian akwa.

Usne wan chiwal pian. Minminkas Dios pian aizpa piankamasachi. Minminkas Dios kishimtu aizpa piankamsachi.

³⁴ “Watcha, minminkas au Anpat mintu aizpa piankamasachi.

Minminkas Diosta kurunsachi, us an tinta akwa.”^v

³⁵ “Diosta chiwazha milamtumikane Diosta paikwasachi, Dios ussa chiwazha kailninnapa, Dios an ñancha wan us mij aizpa ussa milat akwa.”^w

³⁶ Diosne wan chiwal sarit.

Uskas wan sarit aizpa watsamtu. Us akwa wan sarit aizpa purai.

Katmizna aune “Dios kwisha wari” kizwizsan. Sunne watcha i.

Aune Dios kuruntu aizpa kitpamakpas

12 ¹ Mane nane uruza ma pitchin kurunnanash. U Diosta piantuz, mirain. Dios aumiza kwisha wat kiwainarit akwa, nane uruza akwanamtus, u Diosta chihkaamanpa, Dios u kajjchu sinam sananapa. An sukin uzamtuasmin, une Dios kaiztu aizpa miarawa, us pashit aizpa kianapa. Sunkana minturuzne Diosta watsal wakpuj wainñanazi. Sunkana kitpamakpas. ² U

^v 11.34 Is 40.13 ^w 11.35 Job 41.11

minñamtu aizpa maizarawa, Diosta pianchiruzkana uzamanpa. Diosne uruza u kajchukin maiznashina, mamaz tuntu minñanapa, Dios pashit aizpa piankamanapa. Dios uruza kapal maizarawane, Diosne uruza kiwainanazi, wat kianapa, Dios pashit aizpa kianapa, an wat uzanapa.

³Dios nawa wat kiwaintit akwa, usne nawa paiña inintamika namninta, wan u uzkin uzturuza kainanapa. “Aune mamaz awakin anza wat makpas” minman. Uruzpain wat min kit Diospa kal uruza chihkarit aizpa piankamtain. Diosta nijkulamtuasmin, une paiña kal uruza chihkanarit aizpa us akwa kiarawa, pailnakima. ⁴Wan awane maza ñakanain mai. Awa mittikas pimpulkas, sailkas, chihtikas, kizpukas wan waji, sunkasa akkwan tuntu kal kin. Mazane wan kal kisachi. ⁵Sunkana Diosta nijkultuzkas akkwan purai. Au akkwan purakas, Cristone aumiza maza kwalmin namnintu. Cristo aumiza maza kwalmin namnintu akwa, ussa nijkulturuzne wannakkanazi.

⁶Diosne pailta awaruza chiwazha kal milanat kit usparuza uspa kal kianapa kiwainamtu. Sunkana Diosne mazantuza Dios pit kainana milanara. Diosta tinta nijkulamtuasmin, Dios pit kainammikane Dios watsal pit wat kainarawa. ⁷Dios anparuza mamaz kal chihkanara, awaruza kiwainnanapa. Suntuzne awaruza tinta kiwainñarawa. Dios mamazta paiña pit kamtanapa chihkamtune, paiña watcha pit kamtammikane wantuza paiña pit tinta kamtanarawa. ⁸Dios mamazta awaruza kurunna chihkamtune, sun kuruntumikane awara wat kurunnarawa, awa wat kulanapa. Akkwan pialkas kumirakas mijtuzne mamaz we mijtuza nailnarawa. Iglesia ininmika awaruza ininnamtuasmin, usne wantuza watsal kwinta kinat kit paiña kal kitpa. Puizaruza kiwainturuzne usparuza watsal kiwainnara, tayaltachin.

Cristora piantuz na kaiztu aizpa kiarawa

⁹Pailta awaruza watsal pashinarain. Kwail kin pashikain. Dios iztakin wat aizpa kirain. ¹⁰Cristora piantuza u kwalkanain pashinarain. Une Cristora piantuza wat minñarawa.

¹¹Diospa kal kimtuasmin, arakan pamun. Diospa mintuasmin, au Anpat Jesucristowa kal tinta kal kirain.

¹²Dios uruza wat kishinamtu akwa, us milashimtu aizpa tiriztain. Tirizamtuasmin, watsal kultain. Awa uruza parishiznin-

namtuasmin, impará imparain wan tailcharain. Pailta payuki-ma Diosta paikwarain.

13 Cristora piantuza, we mijtuza, u mij aizpa naittain. Cristora piantuz attishtas akane, attuza yal nammilarain.

14 Awa uruza parishznintukas, Diosta uspa akwa paikwarain, Dios usparuza wat kinanapa. Usparuza sinkanamtuasmin, usparuza kwail pit paraman.

15 Awa watsal kulamtuasmin, usparuzkasa watsal kularain. Awa tayal kit aztuasmin, uspakasa tayaltain.

16 Wantuza kawarain mintain, wan awakasa kalpain uzanapa. “Nane mamazkin an warish” minmun. Tinta chiruzkasakas puizaruzkasakas wanmaktain. “Nane wan chiwal pianish” kizmun.

17 Maza nua kwail kitne, ussa kawara kwail kimun. Puija kimun. Awakasa uzamtuasmin, usparuza wat kinat kit uspa iztakin watsal uztain. 18 An sukin kwail uztuza tailchanamtukima, une wan awakasa kalpain uzmiztawai. 19 Dios ussa piantuza pashinamtu akwa, mizhain. Maza uruza kwail kitne, sunkana kwail puija kinchi. Diosmin kwail kintumikasha ilnazi. Dios pinkihta ka parit: “Au Anpatne ka kizta: ‘Nane kwail kintuza ilnanash. Nane uspa kwailkana kiarit aizpa usparuza kailninnanash, parishizana-pa,’”^x ka au Anpat kizta. 20 Sunkas Dios pinkihta ka parit:

“Nu uzkin aliztuz aakane, yak kirit aakane, kumira usparuza kwinnarawa.

Aliz kwazi kiltittuz aakane, kwazi kwinnarawa.

Sunkana aliztuza kwinnarane, sun aliztuzne mitsal kiarinazi.”^y

21 Uruzpain wat iztain. Aliztuz uruza kwail kiamtukas, usparuza kwail puija kinchi. U aliztuza wat kiamtune, une izmuruz namashina. Aliztuza wat kirain, kwailtuza anuppananapa.

Diosta piantuzne gobierno mikwaruza miarawa

13 1 Wan Diosta piantuzne gobierno mikwaruza miarawa. Diosne sun mikwaruza namninnara, awaruza ininnanapa. Diosmin usparuza nanarit, an sukin uztuza ininnanapa. Uspane usparuzain ininna namarachi. 2 Dios mikwaruza namninarit akwa, mikaruza mimtuchiruzne Diostakas miamtuchi.

^x 12.19 Dt 32.35 ^y 12.20 Pr 25.21-22

Diosne suntuza nanarít, mímtochiruza uspa kwail akwa ilnana-pa. ³ Wat kímtoúmíkane míkwará chí ishkuúkain. Kwail kímtoúzne míkwará ishkuúmtu. Katmízna u míkwará ishkuúshítkine, watsalmin kirain, míkwa uruza “watmin kiamti” kiznapa. ⁴ Diosne sun míkwaruza namninnara, awaruza kiwainanapa. Kwail kímtoúruzne míkwará ishkuánazi, míkwa kwail kímtoúza ilnamtu akwa. Míkwané Diosta kiwaintu, kwail kímtoúruza ilnanapa. ⁵ Katmízna une míkwa kuruntu aizpa mñarawa, uspa Dios akwa kwail kímtoúruza tinta ilnamtu akwa. Une míkwará mñarawa, us ininta aizpa wat akwa. Une u kaijchukin sun wari pianmai. ⁶ U sun wari pian akwa, une gobiérno awaruza pial taamtú. Míkwaruz uspa kal kiamtuasmin, uspane Dios akwa kal kiamtu, Dios usparuza sun kal kin mñararít akwa.

⁷ Une gobiérno awaruza we tarít aizpa tarawa. Suparuzkas uspa su akwa gobiérno awaruza pial tarawa. Une wan míkwaruza wat minñat kit uspa akwa wat kaiztain.

Awa anparuza pashinarawa

⁸ Pial puímíkane namnílammíkasha pial kailnintawa. U wan an sukin uztuzpa minñamtúasmin, wan Cristora piantuza pashinarawa. An sukin uztuza pashinamtúmíkane wan Dios inintít aizpa kinazi. ⁹ Diosne sunkana awaruza ininnara: “Patna ashampakasa pitkain. Patna ampukasa pitkain. Mamaz awaruza piantakain. Patna walkukain. Mamaz mij aizpa pashikain.” Dios sun pit awaruza ininnarakas, usne mamaz pit awaruza ininnara, kianapa. Ka kaiznara: “Une uruzpain pashinamtukanain wan awaruza pashinarawa. Sunkana pashimtumíkane wan Dios inintít aizpa kinazi.”^z ¹⁰ An sukin uzturuza pashinamtúmíkane usparuza kwail kimanazi. Katmízna awaruza pashinamtúmíkane Dios inintít aizpa mít kit sunkana kinazi.

¹¹ Na kaiztít aizpa mít kit kirain, pailtímtu payu anpain pantu akwa. Na wan uruza kaiznarít aizpa níjkulat kit Diospa kal tinta kirain. U Cristora níjkularakima, akkwan payu píntít. Cristone anpain. Usne piannanpain, aumíza watsat mílnana. ¹² Amta pailka, kínmíztui. Sunkana Cristone piananpain, aumíza watsat mílnanapa. Awa amtawara kwail kímtoúkanain kiman. Une Diosta paikwarain, Dios uruza kiwainanapa, u ñamin kwail kia-

^z **13.9** Éx 20.13-15, 17; Dt 5.17-19, 21; Lv 19.18

rit aizpa kiamanpa. Ma an sukin kwail kinintumika chamtuasmin, Diosta paikwarain, Dios uruza kiwainnanapa, kwail kinintumika kuruntu aizpa kiamanpa. **13** An sukin uzamtuasmin, aune wat awakanain watsal uztawamakpas. Aune pirit chamtuzkana uzamasan. Aune awa pishta kwiamtukanain izamasan. Ampune mamazpa ashampakasakas pitkain. Ashampane mamazpa ampukasa pitkain. Aune mamazkasa waya kiamasan. Aune mamaz mij aizpa pashiamasan. **14** Cristo uztakana uzarawamakpas. Aune au Anpat Jesucristora paikwatpamakpas, us aumiza kiwainanapa, au kwail kiashimtu aizpa kiamanpa.

Diosta we piantuza sapnarain

14 ¹Une Diosta nijkulturuza sapnarain, uspa wan Dios kamtarnarit aizpa mama we piankamamtukas. Diosta piantuz ukasa nijkine, ukanain minñamtuchine, usparuza pilchapuzman, mamaz tuntu minñamtu akwa. ²Maza kwinta kainanamtus. Mazantuzne wan ña kwashimtumakpas minñamtu. Anpa Judío awane “wan ña impa i” minñat kit kuamanazi. Diosta we nijkultumikane “sun ña kumanash” mintu. Minminkas ña kumtuchiruza kwail minman, Dios usparuzakas sapnara akwa. ³Wan ña kumtumikane ña kumtuchimikawa kwail minachi. Kawarain ña kumtuchimikane wan chiwal kwashimtumikawa kwail minachi, Dios ussa saptit akwa. ⁴Une mamazpa kiwainmikasha kwail kimti kaizman. Kiwainmikawa anpatne paiña wat kirit aizpakas paiña kwail kirit aizpa kainanazi. Kawarain Diosne paiña kwaltuza kiwainnazi, us pashimtu aizpa kianapa.

⁵Mamaz kwinta kainanamtus. Mazantuz maza payuin Diosta paikwatpamakpas minñamtukas, anparuzne wan payu kawarain mai minñamtu. Wan payuwa minñarawane, wan awaruzne chiwazha payu narawa, Diosta wakpuj waina. ⁶Minpazha maza payura Diosta wakpuj waina nashimtumikane sun payura au Anpatta paikwashina, Dios pashit aizpa kinpa. Chiwazha kumira kwashimtumikane Diosta aishtaish kiz kit au Anpat pashimtu aizpa kishina. Chiwazha kumira kwashimtuchimikane mamaz kumira kwashina. Usne au Anpatta aishtaish kiz kit au Anpat pashimtu aizpa kishina.

⁷Minminkas usmin pashimtu aizpa kin uztuchi. Kawarain minminkas paiña imtu payura namtuchi. ⁸An sukin uztuasmin, aune uzshimtumakpas, Dios pashimtu aizpa kin. Au inakima,

aune Dios pashimtu aizpa kianapas. Au irikane, aune Dioskasa wanmakkanapas. ⁹Cristo irawane, Diosne ussa mamasa kakulninta. Katmizna Diosne ussa au Anpat namninta, uzturuzakas irittuzakas ininnanapa.

¹⁰Une Diosta piantuzpa kwail pit paraman, ukanain Diosta wakpuj wainñamtuchine. Une Diosta piantuzpa kwail minman. Mamaz payura wantuzne Dios iztakin kunanapas. Suane Diosne aumiza au kwail kiarit aizpakas au wat kiarit aizpakas kainanana-nazi. ¹¹Sunkana Dios pinkihta ka parit i:

“Anpatne ka kaiztu: Une na uztui pianmai. Kawarain na kaiztu aizpa watcha i.

Pailta awane na iztukin wakpuj wainñanazi.

Wan awane nawa ‘usne Dios i’ kizanazi.”^a

Katmizna mamaz ukanain Diosta wakpuj wainñamtuchine, us-pawa kwail paraman. ¹²Sunkanain aune, wan Diosta piantuz-ne, Dios iztukin kuntawamakpas, au kiarit aizpa Diosta sinkana.

Diosta piantuza kwail kinpa kininman

¹³Katmizna Dios wan awa kiamtu aizpa pian akwa, aune mamaztuzpa kwail paratchiwamakpas. Aune Diosta piantuz iztakin nil uzana nanarawamakpas, usparuza kwail kininnanapa. ¹⁴Na Anpat Jesúsita piankamtit akwa, uskasa wanmaktit akwa, nane chiwazha kumira wa aizpa wari pianish. Minpazha chiwazha kumira impa i mintumikane an kumira impa aizpa kwanchi. Ussa kumira impa aizpa kwanka kizman. ¹⁵U Diosta piantuza pashinam-tune, une chiwazha impa aizpa kuamanazi, mamaz Diosta pian-tuza kwail kininnanapa. U chiwazha kumira kwashimtukas, une sun kumira akwa Diosta piantuza kwail kininnashina. U uspa iztu-kin sun impa kumira kwatne, “awane chiwazha kwail kishimtu-makpas” minñashina. U Diosta piantuza kwail kinintune, awane uruza “ukas kwail kiamtu” kizanazi. Diosta piantuz akwa sunkana kiman, Cristo uspa akwa irit akwa. ¹⁶U chiwazha wari minñamtu-kas, mazantuzne u kiamtu aizpa kwail i minñashinai. Mazantuz u kiamtu aizpa kwail i minñarane, sunkana kiman, mazantuz kwail kininmanapa. Suasne minminkas Diosta piantuzpa kwail minñan-azhi. ¹⁷Awa chiwazha impa kumira kuman kizamtukas, aune Dios pashimtu aizpa kiarawamakpas. Diosne Diosta piantuza inin-

^a14.11 Is 45.23

ashimtu. Suasne Diospa Sinam Izpulne uspakasa uznazi, nil awakana namninnanapa, mamaztuzkasa kalpain uzanapa, watsal kul-anapa. ¹⁸Cristora kiwainturuzne, us kaizta aizpa mĩmturuzne, Dios pashimtu aizpa kianazi. Suasne awane uspawa wat minñana-zi.

¹⁹Aune wan Diosta piantuza wat kiwainnarawamakpas, wan wanmakkat kit kalpain uzanapa, Diosta an wat piankama-napa. ²⁰U chiwazha kumira kwashimtukas, sun kumira kuman, Diosta pianmikasha kwail kinintane. Dios ussa kamtarit aizpa kaninman. U wan kumira kwashiamtukas, une chiwazha kumi-ra kwashikain, u mamazta kwail kinintane. U akwa usne impa kumira kwat kit paiña kaijchukin kwail kimtus minazi. ²¹Une chiwazha wat aizpa kirain. Minpazha impa kumira kwail i min-tane, us iztukin kuman, mamazta kwail kininmanpa. Minpazha vino kwail i mintane, us iztukin vinokas kuman, mamazta kwail kininmanpa. Diosta pianmikasha kwail kinintu aizpa kiman, Diosta kwayamanpa. ²²U wan kumira kuamtu akwa, une ma-maz Diosta pianmikasha impa kumira kwanka kizman. U chi-wazha kumira kuamtukas, Diosne u kuamtu aizpa piankam kit sun kumira impa i kizmanazi. Diosta piantuzne, uspa kiamtu aizpa wari nijkulturuzne, wat kiarinazi, uspa Dios iztakin kwail kiamamtuchi pian akwa. ²³Impa kumira kwatmikane Dios izta-kin kwail kirau minazi. Usne paiña kaijchukin “na kwail kirau” minazi. Dioskas ussa “kwail kiri” kiznazi, impa kumira kwat akwa. Diosne uruza wat aizpa piankamninnanazi. Dios iztakin nil aizpa kamarachiruzne kwail kiamtu.

Mamaztuza kiwainnarawa

15 ¹Au Diosta an nijkulturuzne, Diosta piantuza, we nijkul-turuza, tailchat kit tinta kiwainnarawamakpas. Au pa-shimtu aizpa kishimtuchiasmin, aune mamaztuza, we piantuza, wat kinarawa. ²Aune wan Diosta piantuza wat kiarawamakpas, uspa nil uzanapa, Dios pit miat kit ussa an wat nijkulanapa. ³Cristo an sukin uzasmin, usne aumiza us uztakanain kamtana-ra. Usne us pashit aizpa kitchi. Awa ussa kwail kizaritkas, usne Dios pashit aizpa kishira. Dios pinkihta paiñawa ka parit: “Dios-ta aliz pilchapuztaruzne nawakas aliz pilchapuzara.”^b ⁴Diosne

^b15.3 Sal 69.9

wan an ñancha paiña pinkihta parit aizpa paninta, aumiza kam-tananapa, sun pit piangkamanapa. Au Dios pinkihta iztuasmin, Diosne aumiza an tinta namninnashit kit kiwainnashina, au watsal kulanapa. Sun akwa aune Diosta tiriztumakpas, us milan namtit aizpa sapnakima. ⁵Dios aumiza tinta namninnamtuasmin, usne umiza tinta kiwainanazi, Cristo uztakanain uzanapa. Usne uruza wanmakninnazi, uruzpain watsal uzanapa. ⁶Sunkana kiarawane, une uruzpain wanmakkanazi, u “Dios kwisha wari” maza pitmin kaizanapa. Une sunkana au Anpat Jesucristowa Papihshta kaizanazi.

Judío chi awaruzkas Dios watsal pit miamtu

⁷Katmizna Cristo aumiza sapnarakain, une wan Diosta piantuza sapnarain, awa “Dios kwisha wari” kaizanapa. ⁸Na uruza kaiztu aizpa mainkain. Cristone chiyuras au sukin ara, Dios Judío awa kwaltuza, an ñamin uztuza, kin namtit aizpa kin. Cristone Judío awaruza kiwainana ara, awa Dios kin namtit aizpa watcha i nijkulanapa. ⁹Uskas akki ara, Judío awachiruza wat kiwainat kit watsat milnana, uspa “Dios kwisha wari” kaizanapa. Davidne sunpa Dios pinkih paritkin ka kaizta:

“Nane Judío awa chi uztukin ‘Dios wari’ kaiznash.

Nakas nua ‘Dios kwisha wari’ kanta kaiznash.”^c

¹⁰Mamasa Dios pinkihta ka parit:

“Judío awachiruzne Dios narit kwalkasa, Judío awaruzkasa watsal kultain.”^d

¹¹Mamasa Dios pinkihta ka parit:

“Judío chi awaruz ‘Dios kwisha wari’ kaiztain.

Chiwal awa ‘Dios kwisha wari’ kiztain.”^e

¹²Mamasa Isaíne Dios pinkihta ka parit:

“Mamaz payura Isaíwa kwalne pashpa milnazi.

Kawirawane, Judío awachiruza ininmiznazi.

Uspane ussa tirizanazi, Dios milan namtit aizpa sappanakima.”^f

¹³U Diosta nijkulamtu akwa, nane Diosta u akwa paikuntus, Dios uruza watsal kulninnanapa, Dios uruza kalpain uznin-

^c 15.9 2S 22.50; Sal 18.49 ^d 15.10 Dt 32.43 ^e 15.11 Sal 117.1

^f 15.12 Is 11.10

nanapa. Diospa Sinam Izipulne uruza tinta kiwainnanazi, Diosta an tirizanapa, us uruza milan namtit aizpa sappanakima.

14 Diosta piantuza, miasthanaka. Nane u nil uzamtu pianish, u mamaztuza wat kinamtu akwa. U Diosta kwisha wat piankamamtu akwa, une wantuza kurunnat kit kamtashina. 15 An pinkih uruza panamtuasmin, nane uruza mazantuz pit pananarau, sun piankamanapa. Nane uruza sun pit nijkulninamtu, na kamta aizpa mainñamanpa. Dios an kal nawa kinpa chihkarit akwa, nane uruza tinta kainanamtu. 16 Diosne nawa kwisha wat kiwainnat kit Jesucristowa paiña kiwainmumika namninta, Judío awachiruz Dios watsal pit kainananapa, Judío awachiruz Dios watsal pit piankamanapa. Judío awachiruz Dios pit miarawane, Jesucristora nijkularawane, Diosne usparuza sappashina, paiña Sinam Izipul usparuza sinam saninnarit akwa.

17 Na Jesucristokasa wanmaktit akwa, nane Diospa kal kin watsal kultus. 18 Cristo paiña kal kinpa nawa kiwaintu akwa, nane uruza kainananash, u, Judío awachiruz, sun watsal pit nijkulanapa. Dios paiña kal kinpa nawa kiwaintu akwa, na Judío awachiruz Dios pit kainanamtu akwa, Jesucristone usparuza Dios pit nijkulninnamtu. 19 Dioskas paiña Sinam Izipulkas nawa tinta kiwainta, ñamin iztachi kalkanain kinpa. Nane Dios pit wan sukin uztuza kapal kainanara. Jerusalén pipulura uztuzkas Iliria surakima uztuzkas, Dios pit miat kit Cristora piankamara. 20 Dios watsal pit paramtuasmin, nane Cristora pianchi purakin irau, Cristowa kamtanana. Nane mamaz awakasa kal kin sairachi ish, uspa kal kiamiztu akwa. Nane minminkas itchiruzkin kal kin irau. 21 Nane Dios pinkihta paritkanain Diospa kal kirau:

“Minpazha sun pit mirachiruz parananazi.

Ñamin Dios pit mimituchiruzne paiña pit piankamanazi.”^g

Pablone Roma pipulura inash mintu

22 Na u uztukin akkwan piji ishimtukas, nane ap kal akwa u uztukin pianatchish. 23 Mane nane ap kal an sukin me paitire, apain wan awa Cristowa miarit akwa. Akkwan añora uruza izna ishimtukas, nane u uzkin mama pianashimtus. 24 Nane uruza izna tiriznamtus. España sura imtuasmin, nane u uzkin putnanash, uruza

^g 15.21 Is 52.15

iznana. Ukasa akkwan payukima nukkulshimtukas, nane ukasa akkwan payuchiin nukkultinash. Nane uruza nawa u yalkin sapanapa paikwanamtus. Kwiztane une pialkasa kumirakasa nawa kiwainñashina, España sura piannankima. ²⁵España sura imtuchasmin, an ñancha nane Jerusalén pipulura irimtus, Diosta piantuza kiwainnanapa, usparuza milarit pial chihkanapa. ²⁶Diosta piantuz Macedonia sura uzturuzkas Diosta piantuz Acaya sura uzturuzkas kain pampa pial wanmakninñara, Diosta piantuza kiwainnashinanapa, sun pial puiza Jerusalén pipulura uzturuza milanana. ²⁷Uspain “sun pial kain wantaanash, usparuza milanana” minñara. Sun Judío awachiruzne Judío awaruza kiwainnarawa, Judío awaruz Judío awachiruza Dios pit kamtanara akwa. Mane sun Judío awachiruzne sun wantarit pial naiyarawa, puiza Judío awaruza kiwainanapa. ²⁸Na an kal pailtawane, wan pial wantara aizpa usparuza chihkanarawane, nane Jerusalén pipulukis puz kit España sura irinash. España sura piannamtuchasmin, uruza izna irimtus. ²⁹Na u uzkin akane, nane Cristo nawa akkwan wat kinanazi pianish.

³⁰Au Anpat Jesucristora nijkulamtu akwa, paiña Sinam Izpulne aumiza kiwainamtu, mamaztuza pashinanapa. Katmizna nane uruza kurunamtus, Diosta na akwa paikuanapa, us nawa kiwainnapa. ³¹Dios nawa pakpanapa paikwarain, Judea sura uzturuz, Dios watsal pit nijkultuchiruz, nawa kwail kiamanpa. Diosta piantuz akwa, Jerusalén pipulura uzturuz akwa, Diosta paikwarain, na usparuza milanamtu aizpa sapanapa. ³²Dios nawa u uzkin ininshitne, Diosta paikwarain, piannanpa. Na u uzkin piannakane, nane watsal tuanash. Suasne nane ukasa wat kulnarinash. ³³Nane Diosta paikumtus, Dios uruza kalpain uzinnanapa, uruza kiwainnanapa, uruzkasa tuanpa. Ka.

Pablone wantuza kakishapu kiznamtu.

16 ¹Nane uruza au wat kwampihsh Febera piankamnintus, ussa sapanapa. Cencrea pipulura uzturuzne ussa Dios iglesiara kiwainnapa naara. ²Us au Anpatta pian akwa, nane ussa sapanapa paikwanamtus. Us Cristora nijkultu akwa, Diosta piantuzne ussa sapat kit us wenamtu aizpa milaarawa. Usne wat izmumika nam kit akkwantuzakas nawakas kiwainzish.

³Priscilarakas paiña ampu Aquilarakas kakishapu kizarain. Uspa paaskas nakas parejuin Jesucristowa kal kiritmakpas.

4 Aliz awa nawa pizshiamtukas, uspane nawa pakpailta. Uspa paasne na akwa inapain azi. Uspane imasarilta. Nakas wan Judío awachi Cristora nijkulturuzkas uspa paasta aishtaish kizta-wamakpas, nawa kiwaintit akwa.

5 Nakas Diosta piantuza, uspa yalkin wanmakmuruza kakishapu kaiznamtus.

Ap izmumika Epenetora, ap pashimtumikasha, kakishapu kizti. Usne Asia sura ñancha Cristora nijkultamika ara.

6 Maríarakas kakishapu kizti. Cristowa kal kimtuasmin, usne uruza kwisha kiwainarit.

7 Andrónicorakas Juniarakas kakishapu kiztain. Uspane nakanain Judío awa mazi. Uspane nakasa kajchira siptit wamazi. Sun paasne doce inintuzkanain kal kiilta. Na Cristora pianchasmin, uspa paasne Cristora nijkulpailtazi.

8 Ampliatora kakishapu kizti. Us au Anpatta wat pian akwa, nane ussa pashimtus.

9 Urbanora kakishapu kizti. Usne nakasa Cristowa kal kirit.

Estaquista, mamaz na pashimtumikasha, kakishapu kizti.

10 Apelesta kakishapu kizti. Awa ussa naizninnarítkas, usne wan tailchat kit Cristora nijkulmiztu.

AristóbuloSPA kwaltuza, paiña yalta uztuza, kakishapu kiztain.

11 Herodiónta, Judío awara, kakishapu kizti.

Narcisowa yalta uzturuza kakishapu kiztain, au Anpat Jesús-ta nijkulamtu akwa.

12 Trifenarakas Trifosarakas kakishapu kiztain. An paas kwampihshne kwisha akkwan Diospa kal kiilta.

Au pashimtumikasha, Pérsidara, kakishapu kizti. Uskas akkwan Anpatpa kal kirit.

13 Ruforakas kakishapu kizti. Au Anpatne ussa narit, paiña kal kinpa. Usne au Anpatta nil kanpara. Rufowa akkuhshtakas kakishapu kizti. Paiña akkuhshtane nawa painkultakanain sap kit watsal kira.

14 Asíncritorakas Flegonterakas Hermestakas Patrobastakas Hermastakas uspakasa wanmakmuruza kakishapu kiztain, Diosta nijkulamtu akwa.

15 Filólogorakas Juliarakas Nereorakas paiña kwampihshhtakas Olimpastakas wan Diosta piantuz uspakasa chamtuzakakas kakishapu kiztain.

16 Wan Diosta piantuza watsal kwinta kinat kit kakishapu kiztain.

Akkis Iglesiara wanmakmuruzne, Cristora nijkulturuzne, uruza uspa pit ininnat kit kakishapu kiznamtu.

Pablone Diosta piantuza kurunnamtu

17 Nane Diosta piantuza kurunnamtu, nakanain kamtamtuchiruzamiamanpa. Mazantuzne Diosta piantuza naiyashimtu, usparuzpaim waya kiamiznapa. Uspane Cristora piantuza mamaz ñanta kamtaamtu, au kamtarit aizpa miamanpa. Uspane u Cristowa kamarit aizpa kamtaamtuchi. Usparuzamiman. Uspakasa chaman. 18 Sun ñanta kamtamturuzne au Anpat Jesucristora kiwainamtuchi. Paiña kal kiamtuchi. Uspane uspain kal kiashimtu aizpa kiamtu. Watsal pit paramtuasmin, uspane we piantuza pirail appamtu, uspa minñamtu aizpa maizanapa. 19 Wan Cristora nijkulturuzne u Diospa watsal pit miamtu pianmai. U Diosta miamtu akwa, watsal ish. Une Diosta paikwatpa, uruza kiwainñanapa pailta payu wat kianapa. Mizurainkas kwail kin pashikain. 20 Au Diosne Satanásta anuppanazi. Suasne Diosne aumiza kalpain uzninnanazi. Mane Diosta paikumtus, us uruza pailta payukima wat kiwainanapa.

21 Timoteone, nakasa kal kimmikane, uruza kakishapu kiznamtu. Lucioakas Jasónkas Sosípaterkas, ap Judío izmuruzkas, uruza kakishapu kiznamtu.

22 Nane, Pablo akwa pinkih pamtumikane, Tercio mun ish. Nakas uruza kakishapu kiztus.

23 Gayo muntitmikakas uruza kakishapu kiztu. Na akki uztuasmin, usne paiña yal nawa nammilarit. Diosta piantuzne paiña yalta wanmakkamtu. Erastokas uruza kakishapu kiztu. Usne an pipuluwa pial watsammika i. Au ña Cuartokas uruza kakishapu kiztu. 24 Nane Diosta paikumtus, au Anpat Jesucristo uruza kiwainnanapa, ukasa tuanpa. Ka.

Pablone minpa pit kiznamtu

25 Aune “Diosne kwisha wari” kiziznapas. Au paiña watsal pit miamtu akwa, usne aumiza an tinta namninnashina. Sun watsal pit uruza kainanamtuasmin, nane Jesucristowa uruza kainanarau. Dios an su sarakima, ñamin awane sun pit piankamarachi. 26 Mane awane sun kamtarit aizpa miashina, Dios

awaruza piankamninnarit akwa. Ñamin Dios pit kainammturuz-
ne Cristowa pĩnkĩhta parit. Au Diosne, pailta payukima uztumi-
kane, aumiza sun watsal pit piankamninnat kit aumiza wan Ju-
dío awachiruzá ininnara, usparuzá kamtananapa, Dios kaizta
aizpa mianapa, Diosta nijkulanapa.

27 Jesucristo aumiza watsat milnarit akwa, aune pailta payu-
kima “Dios kwisha wari” kiztawamakpas. Usne wan chiwal
pian. Usmin Dios i. Mamazne wachi. Sunne watcha i.

Ka. Pailti.